

# *MGA PANGHITABO*

## *NGA GIHIMONG KLARO*

### *PINAAGI OG PROPESIYA*



Iduko nato ang atong mga ulo karon alang sa pag-ampo. Among Ginoong Dios, gamhanang Magbubuhat sa mga Langit ug yuta, Nga nagbanhaw kang Jesus gikan sa mga patay, ug buhi uban kanamo hangtud niining duha ka libo ka tuig, kanunay'ng buhi aron pamatud-an ang Iyang Pulong ug himoon Kining tinuod sa matag henerasyon. Mapasalamaton gyud kami alang sa Iyang Balaang Presensiya karon mismo, ingon nga nahibalo, nga aduna kami niining dakung kasiguradohan, nga human matapos na kining kinabuhia, aduna kami'y Kinabuhing Walay Katapusan sa kalibutan nga umalabot. Salamat Kanimo, tungod niini, Ginoo. Ug sa paglaum, nga usa ka angkla sa kalag, nga malig-on ug sigurado sa panahon sa unos. Ug pagmoabot ang mga unos, pag-nagakalukot ang dagkung mga balod, mabati namo nga pinaagi sa pagtoo Kaniya mahimo namong paibabwan ang tanang balod.

<sup>2</sup> Dios, tabangi kami karong gabhiona ingon nga mianhi kami aron tabangan ang mga masakiton ug ang mga nanginahanglan. Nagaampo kami, Dios, nga wala na'y usa ka tawong masakiton sa among taliwala pagmanguli na kami niining gabhiona. Hinaut nga mamaayo ang matag tawo pinaagi sa Imong Balaanong Gahum, kining mga ania dinhi ug sa tibuok nasud, nga mga nakakonekta, hinaut nga wala na'y usa ka tawong maluyahon ang mogawas gikan sa unsa man nga bilding o sa unsa man nga panagtigum karong gabhiona. Hinaut nga ayohon sila sa Imong Espiritu. Itugot nga ang dakung Adlaw sa pagkamatarung, nga may dala og kaayohan diha sa Iyang mga pako, mosubang, og ipadala ang mga silaw sa pagtoo ngadto sa matag kasingkasing sa diha nga magapatalinghug sila sa Pulong, makita ang mga pagpadayag sa Balaang Espiritu nga ginaaghat sila nga Siya'y buhi sa gihapon. Ginaampo namo kini nga mga panalangin, Amahan, sa Ngalan ni Jesus. Amen.

Mahimo na kamong manglingkod.

<sup>3</sup> Sa ginaisip gyud namo kini nga usa ka dakung pribilihiyo nga maania karong gabhiona, pag-usab, aron—aron magpakigsulti nganha sa mga tawo ug magaampo para sa mga masakiton. Gusto namong pangumostahon ang tanan nga anaa sa mga lugar nga—nga nakakonekta sa telepono sa tibuok

nasud, usab karong gabhiona. Ug busa ginaampo namo nga ang Dios magapanalangin sa matag usa kaninyo, nagasalig nga ang tanang midawat kang Cristo kaganinang buntag mapuno sa Espiritu Santo ug padayon nga magkinabuhi nga maunongon ug matinud-anon Kaniya hangtud nga matapos na kining kinabuhia dinhi ibabaw sa yuta, kining mortal nga kinabuhi. Ug dayon sila, pinaagi sa pagbuhat niana, magkaaduna sila og Kinabuhing Walay Katapusan. Dili na gayud sila mamatay sa maong kapanahonan nga umalabot, ngadto sa halangdong Kapanahonan nga ginalauman natong tanan.

<sup>4</sup> Karon isulti ko kini, samtang nahunahunaan ko pa kini, aron dili na makadisturbo. Ania si Igsoong Vayle, ug tingali'g dili ko na siya mahimamat. Akong. . .Mahimo bang ipadala ko na lang kanimo kadtong manuskrito pagmakabalik na ko sa Tucson? Ginabasa pa nako kini, wala ko pa man gud nabasa ang kinatibuk-an niini, ug ipadala ko kini'g balik kanimo sa dihadiha nga makaabot na ko sa Tucson.

<sup>5</sup> Karon gusto kong mohimo og usa ka pagpahibalo. Para gyud kini sa mga kasimbahanan sa bisan asa, ilabina diha sa Kasadpan, o sa bisan asa man nga gustong motambong. Ang atong bililhon nga igsoon, si Igsoong Peary Green, uban sa. . .Siya mao ang tawong nagpasiuna niining pagkonekta sa telepono dinhi. Gipahimutang na sa Ginoo diha sa iyang kasingkasing nga adtoan ug bisitahon niya kita didto sa Tucson, ug magsugod og usa ka rebaybal sa Tucson, nga gikinahanglan gayud nato. Ug maanaa si Igsoong Green sa Tucson. Kung gusto ninyo siyang kontakon, pag-kontak lang mo sa among opisina didto. Mamahimo kana sa ika-10 sa Agosto, ika-11, ika-12, ug ika-13. Anaa na kana sa iyang kasingkasing sa dugay na nga panahon, ug giingnan ko siya nga adunay “usa lang ka paagi nga mawala kana sa imong kasingkasing, adto ka ug buhata kana.” Ug siya'y usa ka Cristohanong igsoon, usa ka tinuod nga alagad sa Dios. Ug kamong mga tawo, diha sa Tucson, nasayod ko nga mapanalanginan gyud kamo sa diha nga magawali siya dinha sa kung asa man, tingali'g sa Ramada Inn o kung asa man magahatag og lugar ang Ginoo, wala pa man niya kini gipahibalo dinhi. Apan nasayod ko nga mapanalanginan gyud kamo sa pagtambong, sa pagpaminaw kang Igsoong Green samtang ipresentar niya kanato ang Pulong sa Dios, tingali'g magaampo pud para sa mga masakiton, o kung unsa man nga mga buhatonon niyang katungdanan sumala sa pagdihog sa Dios.

<sup>6</sup> Gusto usab natong pasalamat si Igsoong Orman Neville, si Igsoong Mann, tungod niining maanindot nga higayon sa pagpakig-fellowship kanila. Mapasalamaton gyud kaayo ko nga magkaaduna, og kahilambigitan sa ingon-niini nga tawo nga sama ni Igsoong Neville, ni Igsoong Mann, ug sa tanan niining uban pa nga mga ministro sa palibot dinhi. Nagtoo ko nga

naipaila na sila. Kung wala pa kamo napaila, sa atong hunta ug sa atong iglesia dinhi, sigurado ko nga nakaila ang Dios kaninyo dinhi ingon nga Iyang mga alagad. Hinaut nga panalanginan kamo sa Ginoo kanunay.

<sup>7</sup> Karon, gihangyo ako og usa ka gamay'ng butang dinhi, mahatungod niining gamay'ng sinulat nga gihatag kanako, aron . . . Aduna sila'y pakigpulong sa mga tinugyanan niadtong miaging gabii dinhi, ang hunta sa mga tinugyanan ug ang hunta sa mga diyakono, ug siguro gibasa na ang maong mga nahisgotan nila kaganinang buntag sa atubangan sa iglesia. Ingon nga, nabatasan na nato nga buhaton kana. Ang mga pag-desisyon nga ginahimo sa hunta sa mga tinugyanan ug sa mga diyakono dinhi sa iglesia, siyempre, dili man gyud kana makapahimuot sa tanan. Dili pud nato mahimo kana. Wala ako'y kahilambigitan ni usa ka butang sa hunta sa mga tinugyanan o sa hunta sa mga diyakono. Gani wala man ko nagaboto gawas lang kung adunay pagkatabla sa boto, ug kinahanglan nga ania ko dinhi aron sa pagboto kung ingon-ana man, si Igsoong Neville na dayon ang nagahimo sa ikaduhang pagboto. Pagkahuman kinahanglan pud namong pirmahan kini, tungod kay kabahin man kami sa iglesia. Apan kung unsa ma'y desisyon nga ginahimo sa hunta sa mga tinugyanan ug sa maong mga hunta, ginasuportahan gyud namo sila sinto porsyento, tungod nga mao kana'y hinungdan kon nganong ania sila dinhi. Ug ang ilang mga pag-desisyon anaa na kana kanila ug sa Dios. Dili ko mahimo, gayud, ug dili gayud, sa bisan unsang paagi, nga supakon kana nga pag-desisyon. Ug usa pa, gidid-an ako sa United States Government nga mohimo og unsa man nga desisyon mahitungod niana, busa palihog ayaw ko ninyo hangyoa nga usabon ang ilang mga pag-desisyon. Dili ko mahimo kana, ug ayaw kong maminaw og unsa man nga ingon-niana. Kita n'yo? Mao nga ayaw ko ninyo hangyoa nga usabon ang ilang mga pag-desisyon. Pakigkita kamo sa maong hunta, tungod sila man ang naghimo sa maong mga pag-desisyon. Bueno.

<sup>8</sup> Karon kon ugaling adunay umaabot nga panagtigum, mahimo nga, kon itugot sa Ginoo, mobalik na usab ko dinhi sa mga ika-upat o ika-unom nga semana, o mora'g ingon niana, siguro alang sa usa na usab ka pang-Dominggo nga panagtigum. Ug akong gipahibalo kaganinang buntag nga gusto kong maghisgot mahitungod sa *Ang Dios Nga Napadayag Diha Sa Iyang Pulong*, pero wala na gyud ko'y oras karong gabhiona, ug, sa tinuod lang, wala na ko'y igong tingog para himoon kini. Ug dayon ang kadaghan sa tawo, halos pareho ra ang gidaghanon diha sa gawas sama sa gidaghanon dinhi sa sulod, ug, tingali'g mas daghan pa gani, pag ihapon ang mga sakyanan ug mga truck ug tanan na nga nakaparada dinha sa gawas uban sa mga tawo. Gipaandar na, gipakusgan na og diyutay ang signal sa radyo, aron madungog nato kini. Kining gamay'ng

pagsibya, pagsibya sa radyo gikan sa tabernakulo, mahimo natong mapaminawan kini hangtud sa gilay-on nga usa ka bloke. Ug ang ubang mga sakyanan pipila ka bloke ang gilay-on, mga laray sa sakyanan, dinhi ug didto, dinha sa mga kadalanan, palibot sa tabernakulo karong gabhiona. Wala ko nagtoo nga sa unsa mang higayon, makita, nga nagkaaduna kita og mas daghang mga tawong nagkapunsisok sa sulod ug palibot sa iglesia kumpara kaniadto kay sa karong gabhiona. Busa kita . . . Ug daghan, daghan, daghan pa ang nagapangabot ug nagapauli.

<sup>9</sup> Busa nagapakita kini, “Kung diin gani ang Gipatay’ng Lawas, ang mga agila magakatapok.” Ug mahimong isulti ko kaninyo karong gabhiona, nga kining diyutay’ng pundok sa mga tawo, usa kini ka masigkanasudnong panagtigum. Halos sobra duha-sa-tulo sa katiponan sa mga estado ang narepresentar dinhi, lakip na ang lima ka mga nasud sa gawas, bisan ang Rusya, ug ang tanang nagkalain-laing mga bahin sa nasud. Hangtud didto sa Venezuela, hangtud didto sa Jamaica, sa tanang nagkalain-laing mga bahin sa nasud, ania ang mga tawo, nga nagakagutom ug nagakauhaw sa Dios. Pagkamaanindot nga higayon!

<sup>10</sup> Karon gusto kong, sa dili pa mobasa sa Biblia, ug mahimo bang iampo ninyo ako karon. Ako—paningkamotan kong magdala og usa ka hamubong mensahe, kon itugot sa Ginoo, mahitungod sa pagpakaangkon og Balaanong kaayohan. Kay, kaganinang buntag naghigot man kita mahitungod sa kaluwasan. Ug niining gabhiona hisgotan pud nato sa pipila ka minuto ang mahitungod sa Balaanong pagpang-ayo, ug pagkahuman magtawag og linya sa pagpaampo ug iampo ang mga tawo. Samtang pagabuhaton nato kini, kamong mga nakakonekta dinha, kung asa man kamo, bisan kamong mga anaa diha sa mga bus ug sa mga sakyanan nga nakaparada, mga usa o duha ka bloke gikan sa tabernakulo; pag-oras na nga mag-ampo alang sa mga masakiton, kung dili man mo makasulod sa bilding. . . Nga, dili na gyud n’yo mahimo pa, sigurado ko mismo karon, tungod ang tanang mga agianan nagkadasok na gayud, puno na, ug wala na’y espasyo sa bisan asa, busa mag-ampo na lang ug ipandong ang inyong mga kamot sa usa’g usa dinha. Ug sa matag ministro nga nakakonekta karong gabhiona, iampo niya usab ang iyang kongregasyon samtang ginapahigayon kining mga panerbisyo sa pagpang-ayo. Nagatoo kita nga ang Dios anaa sa tanang dapit, sa bisan asa man. Karon sa dili pa kita mobasa o . . .

<sup>11</sup> Sa dili pa kita—kita mag-ampo, gusto natong mobasa una og pipila ka Pulong sa Dios. Ug giusab ko ang akong—akong mga Kasulatan kaganina, tungod nga gusto kong usabon ang klase sa panagtigum nga gihan-ay ko na sa akong hunahuna para unta niining gabhiona, busa medyo giusab ko kini; ug mao nga kinahanglan pud nakong usabon ang akong mga Kasulatan, dili

ingon nga usbon ang mga niini, kondili ihan-ay ra ang mga niini sa usa pa ka kahan-ayan, mahitungod sa Balaanong pagpang-ayo, aron nga—nga masabtan sa mga tawo.

Ablihan nato sa San Lucas, sa ika-24 nga kapitulo. Ug magsugod kita sa ika-12 nga bersekulo sa ika-24 nga kapitulo, ug basahon paubos hangtud sa ika-34. Mahitungod kini sa pagkabanhaw ni Ginoong Jesus.

*Apan si Pedro, si Pedro mitindog, ug midalagan paingon sa lubnganan; ug sa pagduko ug paglili niya, ug iyang hikit-an ang mga panapton nga lino . . . nga nagakahibulong sa nahitabo.*

*Ug, ania karon, ang duha kanila nangadto sa maong adlaw sa usa ka balangay nga ginganlag Emmaus, nga gikan sa Jerusalem may napulog usa ka kilometro.*

Karon, nagkinahanglan kini og napulo ka kilometro aron mohimo—aron mohimo og usa ka milya, busa mga unom ka milyas kadto.

*Ug samtang nagsinultihanay sila mahitungod . . . niining mga butang nga nanghitabo.*

*. . . nahitabo, nga, samtang nagsinultihanay sila ug nagpinangutan-anay, si Jesus miduol, ug mikuyog kanila.*

*Apan ang ilang mga mata nahipugngan aron dili sila makaila kaniya.*

*Ug siya miingon kanila, Unsang mga hilisgutan kini nga inyong ginasultihan, samtang nagalakaw kamo, ug sila mihunong nga nagmasulob-on?*

*Ug ang usa kanila, nga ginganlan si Cleopas, mitubag og miingon kaniya, Ikaw ra ba ang bugtong dumuloong sa Jerusalem, ug wala ka mahibalo sa niining mga butang nga nanghitabo . . . niining mga adlaw?*

*Ug siya miingon kanila, Unsang mga butanga?*

Karon hinumdumi, nga kini mao si Jesus Mismo, nga nabanhaw, og nagapakig-istorya.

*Ug sila miingon kaniya, Mahitungod kang Jesus nga Nazareton, nga usa ka propeta nga gamhanan sa buhat ug sa pulong sa atubangan sa Dios ug sa tanang tawo:*

*. . . naunsa nga ang mga pangulong sacerdote ug among mga punoan nagtugyan kaniya ngadto sa . . . aron—aron pagahukman sa silot sa kamatayon, ug naglansang kaniya sa krus.*

*Apan kami milaum nga siya mao kadtong magatubos sa Israel: ug labut pa niining tanan, ikatulo na ka adlaw karon sukad sa pagkahitabo niining mga butanga.*

*Ug labut pa, ang ubang mga babaye nga kauban namo nakapatingala kanamo, sa tapus sila managpangadto sa lubnganan sa sayo pa kaayo;*

*Ug sa wala nila hingkaplagi ang iyang lawas, namalik sila, nga nagaingon, nga nakakita sila og panan-awon sa mga manulonda, nga nanag-ingon . . . nga siya buhi.*

*Ug ang uban sa mga kauban namo nanagpangadto sa lubnganan, ug hingkaplagaan nila ang mao usab sumala sa giingon sa mga babaye: apan siya wala hik-it nila.*

Paminawa karon; si Jesus.

*Ug siya miingon kanila, Oh mga tawong buangbuang, . . . mga maluya og kasingkasing sa pagtoo sa tanang giingon sa mga propeta:*

*Dili ba kinahanglan nga si Cristo mag aantus niining mga butanga, ug magasulod sa iyang kahimayaan?*

*Ug sugod kang Moises ug sa tanang mga propeta, iyang gisaysay kanilang tanan, ang mga butang sa tibuok nga kasulatan mahitungod sa iyang kaugalingon.*

*Ug sa nagkahiduol na sila sa balangay, nga ilang gipadulongan: ug iyang gihimo nga ingon sa mopadayon siya sa unahan.*

*Apan ilang gihawiran siya, nga nagaingon, Pabilin ka uban kanamo: kay haduol na ang kagabhion, ug nahilig na ang adlaw. Ug siya misulod sa pagpabilin uban kanila.*

*Ug nahitabo, nga sa nakalingkod siya uban kanila sa pagkaon, mikuha siya og tinapay, ug gipanalanginan kini, ug gipikaspikas kini, ug gipanghatag kini kanila.*

*Ug nangabuka ang ilang mga mata, ug ilang naila siya; ug siya nawala sa ilang panan-aw.*

*Ug sila nasig-ingon ang usa sa usa, Wala ba magdilaab ang atong mga kasingkasing sa sulod nato, samtang nagasulti siya kanato sa dalan, ug samtang siya nagasaysay kanato sa mga kasulatan?*

*Ug mingtindog sila sa maong takna, ug namalik sa Jerusalem, ug hingkaplagaan nga nagatigum ang napulo ug usa, ug sa dihang sila kauban nila,*

*Nga nagaingon, Matuod gayud nga nabanhaw ang Ginoo, ug nagpakita kang Simon.*

*Ug gisugilon nila ang nahitabo sa dalan, ug sa unsa nga paagi nga ilang hing-ilhan siya pinaagi sa pagpikaspikas niya sa tinapay.*

<sup>12</sup> Karon mag-ampo kita. Minahal nga maloloy-ong Amahan, nagapasalamat kami Kanimo tungod sa Imong Pulong, kay ang Imong Pulong Kamatuoran, ang Imong Pulong Kinabuhi.

Ug Ikaw, Oh Ginoo, ug ang Imong Pulong Usa ra. Busa nagaampo kami karong gabhiona, Ginoo, nga moanhi Ka sa among taliwala sa gahum sa Imong pagkabanhaw ug magpakita Ka nganhi kanamo karong gabhiona, sama niadtong mga nagagikan sa Emmaus, aron kami usab magapanguli sa among mga panimalay, nga manag-ingon, “Dili ba ang atong mga kasingkasing nagdilaab man sa sulod nato?” Itugot kini, Ginoo, ingon nga haduol na ang oras sa kagabhion usab. Kay amo kining ginapangamuyo sa Ngalan ni Jesus. Amen.

<sup>13</sup> Karon gusto kong maghisgot mahitungod niini nga Biblia. Ug ang akong hilisgotan karong gabhiona, ingon nga hilisgotan, mao ang: *Mga Panghitabo Nga Gihimong Klaro Pinaagi Og Propesiya. Mga Panghitabo Nga Gihimong Klaro Pinaagi Og Propesiya.*

<sup>14</sup> Karon, ang Biblia usa ka lahi nga Libro kay sa tanang uban pang balaan nga mga libro. Ang Biblia usa ka lahi nga Libro. Usa Kini ka Libro sa propesiya, nga nagapropesiya sa umalabot nga mga panghitabo. Ug Kini usab mao ang Kapadayagan ni Jesus Cristo. Gikan sa Genesis hangtud sa Pinadayag, ginapadayag Siya diha sa Iyang kahupnganan, kung unsa Siya kaniadto ug sa karon. Ug ang tibukok og kumpletong Basahon, sa Pinadayag 1:1 hangtud sa 3, miingon nga ang maong Libro usa ka Basahon sa “Kapadayagan ni Jesus Cristo,” nga mao ang Pulong sa Dios. “Ang Kapadayagan ni Jesus Cristo,” ang Pulong sa Dios!

<sup>15</sup> Karon, ang tanang uban pa nga mga libro, balaan nga mga libro, mga pang-etikong kodigo lamang, pang-moralidad nga kodigo lamang, o pang-teolohiyang kodigo lamang. Usa ka butang nga . . . Pila ba ang nakabasa na sa Koran, ang Biblia sa mga Mohammedan, ug—ug sa libro sa mga Buddhist, ug uban pa? Usa lamang kini ka pang-etikong kodigo, kung unsa ang angay’ng ikinabuhi sa mga tawo, kung unsaon nila sa pagkinabuhi, apan wala kini nagapropesiya, wala nagasulti og unsa man mahitungod sa ingon-niining mga butang o mahitungod sa unsa mang espesyal nga mga gasa nga gikahatag kang kinsa man, og sa unsa mang butang nga magakahitabo. Sama ra sa pagpamiyembro sa usa ka kapunongan o ingon-niana. Busa, pagmoabot na ang mga kaiglesiahan sa punto nga ginahimo nila ang ilang iglesia nga usa na lang ka kapunongan nga pagaapilan, kung ingon-ana napahilayo na sila sa Pulong sa Dios.

<sup>16</sup> Tungod kay ang Biblia usa ka buhi, mga gisulti nang daan nga mga pagsaksi mahitungod kang Jesus Cristo. Ug maingon nga ang kalibutan naporma ngadto sa kahupnganan niini, ug ang mga punoan nga midaku ngadto sa kahupnganan niini, ang adlaw nga misubang ngadto sa kahupnganan niini, ang Biblia napadayag usab diha sa kahupnganan Niini sa Persona ni Jesus Cristo. Siya mao ang Pulong sa Dios nga napadayag, ang tibukok og kumpletong Basahon sa Katubsanan. Ang Biblia Pulong sa

Dios, nga nagapropesiya sa umalabot nga mga panghitabo. Ang mga magtotoo Niini gimandoan sa Tagsulat Niini nga basahon ug toohan ang matag Pulong Niini, dili nga bahin lamang Niini. Usa ra ka Pulong Niini, ang dili-pagtoo Niini, mas maayo pa nga mohunong ka na lang sa pagpaninguha hangtud nga matoohan mo kana nga Pulong. Ang matag Pulong bug-os gayud nga kabahin sa Dios nga Makagagahum-sa-tanan; napadayag ang Dios, naputos diha sa Iyang Pulong, aron maipakita kung si Kinsa Siya. Gimandoan kita, ingon nga mga magtotoo, nga toohan ang matag Pulong Niini. Ug gisulat Kini sa Tagsulat sa Dios Mismo. Walay si bisan kinsa ang makadugang og bisan unsa ngadto Niini o makataktak man og bisan unsa gikan Niini. Kay kung inyong buhaton kana, mamahimo kining usa ka kibag na nga lawas sa Dios. Magkaaduna kini, tingali mora'g unom na ka mga tudlo sa usa ka kamot, o—o kaha tulo na ka mga bukton, o ingon-niana, ang pagdugang og usa ka butang, ang pagtaktak og usa ka butang gikan niini ug mahimong kulang na kini og usa ka bukton, kulang na og usa ka tudlo. Kini ang kumpletong Lawas ni Jesus Cristo. Ug si Cristo, ingon nga mao ang Lalaki, ang Pamanhonon, girepresentar usab ang Pangasaw-onon diha Kaniya. Ug kining duruha Usa ra. “Niadto unyang adlawa kamo makaila nga Ako anaa sa Amahan, ang Amahan ania Kanako, Ako anaa kaninyo ug kamo ania Kanako.” Kumpleto kaayong paghulagway!

<sup>17</sup> Ug ang matuod nga mga magtotoo niini nga Pulong, nga midawat Niini sa ingon-nianang paagi, nagatoo gyud Niini, ug mapailubon nga nagapaabot alang sa gipropesiya na nga mga saad Niini, nga mamatuman ang matag usa kanila sa iyahang kapanahonan niini. Ang matag magtotoo nagapaabot niini. Ang matag magtotoo nga nagatukaw, nagapaabot, mao ra ang mga gikapadayagan niini.

<sup>18</sup> Karon tan-awa ninyo sa mga adlaw kaniadto sa pag-abot ni Ginoong Jesus. Nganong wala man hiilhi sa niadtong mga tawo si Juan, sa dihang klaro na man nga gisulti sa Biblia pinaagi ni Isaias, “Adunay usa ka tingog nga magasinggit sa kamingawan, ‘Andama ninyo ang dalan sa Ginoo’”? Ang katapusan nilang propeta nga aduna sila kaniadto, nga mao si Malaquias 3, miingon, “Tan-awa, Akong ipadala ang Akong mensahero sa atubangan Ko aron sa pag-andam sa dalan.” Nganong wala man nila nakita kadto? Tungod nga nagalantaw sila sa usa ka butang nga nahimo na, nagabasi sa ilang mga panghunahuna sa usa ka mensahe nga milabay na sa una pa, ug nangapakyas hinoon nga makita ang kasamtangang kapadayagan sa Dios sa maong adlaw nga ilang gikapuy-an kaniadto.

<sup>19</sup> Ug ang mga Cristohanon, sa bisan asa, dinha eksaktong makaplagan mo ang kalibutan niining gabhiona. Dili gyud malalis, mao kana ang kamatuoran! Ang mga Cristohanon, sa bisan asa man, naninguha pa sa paglantaw balik sa pang-etikong



kodigo nga gisulat ni Mr. Luther, o ni Mr. Wesley, Sankey, Finney, Knox, Calvin; nga walay ni usa kanato ang makasulti og dautan bahin niana, apan sa milabay na nga panahon kana.

<sup>20</sup> Ang mga Fariseo milantaw pa balik sa kung unsa'y gisulti ni Moises, ug miingon sila, "Anaa kanamo si Moises. Wala kami masayod kon diin Ikaw naggikan."

<sup>21</sup> Apan hinumdumi, nga sa kaniadtong ania pa si Moises, wala man sila nasayod kung asa siya gikan. Kita n'yo? Ug karon sila. . . Dili ikatingala nga miingon si Jesus kanila, "Inyong ginadayandayanan ang mga pantiyon sa mga propeta, ug kamo mao'y nagbutang kanila dinha." Pagkahuman nga milabay na ang ilang Mensahe! Pag-nagaagi ang Mensahe, makita Kini sa mga tawo, og ilang ginabiyaybiayan Kini (ingon niana ang ginabuhat sa kalibutan). Ug dayon pagkahuman nga milabay na ang mensahero ug tapos na pud ang maong Mensahe, dayon magtukod sila og usa ka denominasyon basi sa maong Mensahe. Ug dinha sila mangamatay, dinha mismo, dili na gayud Mabuhi pag-usab.

<sup>22</sup> Tan-awa ninyo sa makadiyut, alang sa pipila kaninyong mga tawo, ug nagasulti ako ilabina kaninyo nga mga Katoliko. Nahibalo ba kamo, nabasa n'yo na ba ang tinuod nga kasaysayan, ang kasaysayan sa iglesiang Romano Katoliko? Kung unsa nga sa inyong listahan sa mga martir, sukad pa kang San Augustine sa Hippo, pila na ka milyon nga inosenteng mga tawo ang gipamatay sa maong iglesia! Nalimtan ko na, dili ko na matiman-an ang eksaktong gidaghanon, apan mga minilyon kadto, sukad nga si San Hippo sa. . . San Augustine sa Hip-. . . sa Hippo, Africa, naghimo og usa ka pamahayag nga kabubut-on kono sa Dios nga patyon ang si bisan kinsa nga magprotesta sa iglesiang Romano Katoliko. Nahibalo ba mo niana, nga si San Patrick wala gayud giila kaniadto gawas na lang pagkahuman sa iyang kamatayon, ingon nga usa ka Romano Katoliko? Giprotestahan niya ang papa ug ang tanang mga buhat niini, ug ang iglesiang Katoliko mismo nagpatay og napulo ka mga linibo sa iyang mga anak mismo. Nahibalo ba mo nga gisunog sa iglesiang Katoliko si Joan of Arc, kadtong makaluluoy'ng balaang babaye, nga nakagapus sa poste, tungod ing-. . . gikaingon nga siya'y usa kono ka balbal. Duha ka gatus ka tuig pagkahuman niadto, gikalot nila ang mga lawas sa responsableng mga pari, sa dihang nahibaloan nila nga sayup kadto, ug gipangtambog sila ngadto sa dagat, nga wala man lang sila gipanglubong sa sagrado nga yuta, aron sa pagbuhat og penitensya.

Ayaw gayud tugoti nga molabay ra ang adlaw ibabaw sa inyong ulo, ug mamahimong mga buangbuang.

<sup>23</sup> Daw sa unsa nga gusto unta niadtong mga pari, niadtong gabhiona, nga mangduol, kadtong mga nagkondena kang Jesus.

Ang butang lang, wala gyud nila nakita ang panagna alang niadtong panahona. Kung ilang . . . Miingon si Jesus, “Susiha ang mga Kasulatan, kay naghunahuna man kamo nga diha Kanila,” o, diay, “nagapamahayag nga makaangkon kamo og Kinabuhing Walay Katapusan, ug ang mga Kasulatan mao’y nagasulti kaninyo kung si Kinsa Ako,” alang niadtong panahona.

<sup>24</sup> Himatikdi, dili gayud mapakyas ang Biblia. Mao kini’y usa ka butang nga dili mabuhat Niini, sa Pulong sa Dios, ang mapakyas, tungod nga nagapropesiya Kini sa mga buhat sa Tagsulat Niini sa dili pa Niya ginabuhat kini.

<sup>25</sup> Karon, aduna ra’y usa ka posibilidad sa usa ka libo nga ang usa ka tawo mohimo og pagpanagna nga mamahitabo ang usa o ang unsa man nga butang, ug mahitabo kini. Apan kung iyang isulti *kung diin* kini mahitabo, mominus ang posibilidad ngadto sa usa na lang sa napulo ka libo. Kung isulti pa niya ang *adlaw* nga mahitabo kini, mominus na sad kini, ngadto sa usa ka posibilidad sa mga usa ka milyon. Ug kang *kinsa* pa kini mamahitabo, samut kining mominus ngadto sa binilyon na gyud ka mga posibilidad.

<sup>26</sup> Apan kining Biblia eksaktong nagasulti kaninyo *kung kinsa*, *kung kanus-a*, *kung asa*, ug *kung unsa* ang umalabot nga mahitabo, ug wala pa gayud napakyas ni usa ka higayon. Busa, sa hamubong pagpakig-istorya ko dili pa lang dugay, sa usa ka pari sa Sacred Heart church dinhi; ingon niya, “Mr. Branham, ginasulayan mong makiglalis sa Biblia.” Ingon pa, “Mao man kana ang kasaysayan sa iglesia.”

Ingon ko, “Dili Kini usa ka kasaysayan. Ang Dios Kini, Mismo, sa sinulat nga porma.”

Ingon siya, “Anaa ang Dios sa Iyang iglesia.”

<sup>27</sup> Ingon ko, “Anaa ang Dios sa Pulong. Ug ang bisan unsa man nga supak Niini, bakak kana. Kay miingon man Siya, ‘Ang Akong Pulong tinuod ug bakak ang pulong sa matag tawo.’”

Ingon siya, “Dili ‘ta kinahanglan maglalis.”

<sup>28</sup> Ingon ko, “Wala man ta ka giingnan nga makiglalis, apan nagaingon ang Biblia, ‘Umari kamo, usahan ta paghusay.’”

<sup>29</sup> Ginapropesiya Niini ang mga buhat sa Tagsulat Niini sa dili pa Niya ginabuhat kini. Busa, sa pagsulti ko niana, ginapahimutang niana ang matag lalaki ug babaye kung ingon-ana, sa Korte sa Paghukom, nga dili gayud makaipsot. Kung tohan ninyo kung unsa’y ginaingon sa Methodist mahitungod Niini, kung unsa’y ginaingon sa Baptist mahitungod Niini, kung unsa’y ginaingon sa Katoliko, kung unsa’y ginaingon sa Pentecostal, o sa unsa man nga uban pang iglesia, mahimong makakaplag kamo og mga pagkapalaw didto sa Paghukom. Apan kung bantayan n’yo lang kung unsa’y ginaingon sa Biblia

nga magakahitabo, ug pagmahitabo na kini, nan maila gyud ninyo kung unsa na'y nagakahitabo.

<sup>30</sup> Karon, dili kini diretsahan nga tataw sa panan-aw nga ang tanang tawo makakita niini, tungod nga gipasalamatan ni Jesus ang Dios sa paglilong niini sa mga mata sa mga makinaadmanon ug sa mga masinabuton, ug gipadayag kini ngadto sa gagmay'ng mga bata ingon sa gusto makakat-on. Hunahunaa ninyo ang Dios nga Makagagahum-sa-tanan nga anaa diha sa Kaugalingon Niyang Pulong, nga adunay kagahum aron pagabutahan ang mga datu ug mga magahi ug—ug mga edukadong eskolar, gibutahan ang ilang mga mata aron nga dili sila makakita Kaniya, ug gibuksan hinoon ang mga mata sa mga kabus ug mga walay kahibalo.

<sup>31</sup> Matikdi kining mga tawo nga mga taga-Emmaus, ang ingon sa Dios nga gipugngan ang ilang—ilang pagpanabot mahitungod Kaniya. Nagpakigsulti sila Kaniya ug wala gani sila nakaila kung si Kinsa kadto, sa tibuok adlaw. Mahimo kana sa Dios, tungod kay Dios Siya.

<sup>32</sup> Eksaktong ingon niana usab ang gibuhat Niya niadtong mga sacerdote, niadtong mga escriba, tungod kay nahisulat na Kini nga kinahanglan Niyang buhaton kadto. Gibutahan sa Dios ang ilang mga mata aron nga magkaaduna kita og kahigayonan. Himatikdi, dili sila makakita, bisan unsa pa sila ka maalamon nga mga eskolar, bisan unsa pa sila ka halangdon nga mga sacerdote, bisan unsa pa ang ilang mga nabuhat, dili sila sa gihapon makakita Niini, tungod kay mga buta sila. Twenty-twenty man ang ilang panan-aw, sa pisikal. Apan buta gayud ang ilang espirituwal nga panan-aw!

<sup>33</sup> Mao gihapong butang ang gipaninguhaan kong isulti kaganinang buntag mahitungod sa pagpanapaw sa mga kababayen-an, ang ilang mga pagpamisti sama sa ginabuhat nila karon. Sila'y mga mananapaw. Sa Libro sa Dios sila'y sad-an gayud sa pagpanapaw sa matag higayon nga nagasul-ob sila og mahilas nga mga binistihan. Ang ilang kalag, og wala sila mahibalo niini. Nagatoo ko nga silang mga kababayen-an, daghan kanila, linibo kanila, ang mga inosente, ug dili nila buut nga manapaw sa unsa mang paagi. Ug ang makaluluoy'ng mga babaye, ingon nga adunay tawo nga pasagdan ra sila nga mamaingon niana, nga dili man lang sawayon ug sultian sa kamatuoran, nga nakahimo sila og pagpanapaw. Ingon nga, nag-ingon na ang Biblia, “Ang dautang babaye nga nagalingkod sa ibabaw sa daghang mga tubig, nga ang tanang mga hari sa kalibutan ug ang mga lumolupyo sa kalibutan, ang mga kaiglesiahan ug uban pa, nakahimo og espirituhanong mga pagpanapaw uban kaniya. Ug siya mao ANG INAHAN SA MGA BIGAON,” sa mga denominasyon.

<sup>34</sup> Ginatan-aw nato ang Biblia, tungod nga wala man kita biyai sa Dios diha sa kangitngit. Gipadala Niya ang Biblia aron sa

pagpropesiya kanato sa mga panghitabo sa dili pa mahitabo ang mga niini, ug sa mismong paagi ug panahon nga mahitabo ang mga niini.

<sup>35</sup> Karon, sama ra kana nga nagatan-aw ka sa usa ka kalendaryo aron tan-awon kung unsa na'y petsa. Kung nagahunahuna ka, moingon ka nga Sabado na siguro, Dominggo, unsa na kaha karon? Tan-awa ang kalendaryo. Ang kalendaryo ang mosulti kanimo kung unsa na nga adlaw. Pagmakita mo ang ginabuhat sa mga tawo, tingali'g nagasimba na, pagmakita mo ang—ang... madungog mo nga nagabagting na ang mga kampanilya, mahunahunaan mo kung unsa na kini nga adlaw. Tan-awa ang kalendaryo, mosulti kini kanimo kung unsa na kini nga adlaw.

<sup>36</sup> Ug pagmakita mo ang iglesia nga nagakahimo nang kalibutanon, sama sa mga adlaw sa Sodoma kaniadto, pagmakita mo ang kalibutan sa iglesia nga nagapaingon na ngadto sa...pagsimba “sa dios niining dautan nga kapanahonan,” ug pagmakita mo kana; dayon makita mo ang diyutay'ng minorya nga pundok nga nagakatipon na ilalum sa inspirasyon sa Dios, ginapamunga na usab ang Kinabuhi ni Jesus Cristo, pinaagi sa mga Kasulatan nga gikatagna nang magakahitabo, kahibalo ka na kung unsa na nga takna ang imong ginapuy-an.

<sup>37</sup> Gisulti nang daan sa Biblia, pinaagi og propesiya, kung unsa nga adlaw ang atong pagapuy-an, ug kung unsa nga oras ang atong pagapuy-an, ug kung unsa nga matang sa mga panghitabo ang gikatagna nang magakahitabo. Sa ingon niana gayud ka eksakto nga nagapropesiya Kini, ug wala pa gayud napakyas bisan sa usa ka kapanahonan, sa tanang panahon. Wala ni usa ka higayon nga napakyas Kini, ug dili gayud Kini mapakyas, tungod nga kadtong mga gipili nang daan nga makakita niini makakita gyud niini. Miingon si Jesus, “Walay tawong makahimo sa pag-ari Kanako, gawas kon pagadanihon siya sa Akong Amahan, ug ang tanan nga gikahatag Kanako sa Amahan magaari.” Ang Pulong Kini nga nagapakighiusa sa Pulong. Dili Kini puedeng magabuhat og laing uban pa. Nasayod kita niini, sa adlaw nga atong ginapuy-an.

<sup>38</sup> Apan sama ra sa matag kapanohanon kaniadto, may mga lalaking ginatugotan sa mga tawo nga ibutang ang kaugalingon nilang interpretasyon sa niini nga Pulong, ug mao'y nagpahinungdan kanila nga mamahimong buta sa mga panghitabo nga nagakahitabo. Mao gihapong butang ang nahitabo sa mga Fariseo ug sa mga Saduceo. Bisan kaniadtong mitindog si Pablo didto ug gipanguhaang ikutlo kanila ang Kasulatan, ug usa ka tawo ang mihampak kaniya sa nawong tungod kay gitawag man niya ang labaw'ng sacerdote nga usa ka pinaputi lang nga bungbong. Ug mao nga nangapakyas sila

nga makita ang Dios nga ginapanghimatud-an ang gipropesiya Niya nga Pulong.

<sup>39</sup> Kita n'yo, wala ginasumpaki sa Biblia ang Kaugalingon Niini; ang Biblia Dios. Wala gayu'y pagkasumpaki sa Dios; Siya'y hingpit.

<sup>40</sup> Apan ang mga tawo, tungod lang gyud sa kaugalingon nilang interpretasyon! Karon matikdi, ipakita ko kaninyo, mga higala. Ang mga kaiglesiahan dili gyud magkauyon sa mismo nilang mga interpretasyon Niini. Ang Methodist dili makauyon sa interpretasyon sa Baptist, ang Baptist sa Presbyterian, ang Presbyterian sa mga Pentecostal. Ug sa halos kuwarenta ka nagkalainlaing mga organisasyon sa Pentecostal, dili sila magkauyon sa usa'g usa. Busa makita ninyo, mamahimo kanang Babilonia pag-usab, kalibugan.

<sup>41</sup> Apan ang Dios ang nagahimo sa Kaugalingon Niyang paghubad sa Iyang Pulong. Gisaad Niya kini nga butang, ug Siya Mismo ang nagatuman niini. Ginahatag Niya, Mismo, ang interpretasyon niini, tungod kay sa nianang takna ginapaila Niya ang Iyang Kaugalingon. Daw sa unsa ka hingpit gayud ang—ang Lawas ni Cristo, gikan sa mga tiil paingon sa ulo!

<sup>42</sup> Himatikdi, ug mao kana'y hinungdan kon ngano nga napakyas kining mga tawo sa pagsabot niini, tungod kay naminaw man sila sa kung unsay ginaingon ni kinsa pa man mahitungod Niini, imbis nga basahon ang Pulong sama sa gisulti ni Jesus kanila nga buhaton, “Ug Kini Sila mao ang nagapanghimatuod Kanako. Susiha ninyo ang mga Kasulatan, diha Kanila naghunahuna man kamo nga makabaton kamo og Kinabuhing Walay Katapusan, ug Kini Sila mao ang nagapanghimatuod Kanako.” Sa ubang pinulongan, paminaw, “Unsa man? Basaha ang mga Kasulatan ug tan-awa kung unsa ba gyud ang gitagna nang pagabuhaton sa Mesias. Tan-awa kung unsa ang gitagna nga oras nga moabot ang Mesias. Tan-awa kung si kinsa ang magauna sa Mesias. Tan-awa ang maong takna. Magkaaduna usá og tingog sa usa nga magasinggit sa kamingawan, si Juan. Ug gibuhat n'yo na kaniya kung unsay gusto n'yo kaniya. Tan-awa n'yo kung unsay gitagna nang pagabuhaton Ko pagmoabot na Ako. Ug karon unsa ma'y gibuhat ninyo? Napakyas ba Ako sa pagtuman Niini?” Kita n'yo, nagasulti si Jesus, “Napakyas ba Ako sa pagtuman Niini?”

<sup>43</sup> Himatikdi, samtang magapadayon kita diha sa mga Kasulatan niining gabhiona, kung unsa nga ang tanang gipropesiya mahitungod Kaniya eksakto gayu'ng nahitabo sa paagi nga gitagna nang mahitabo kadto. Nahibaloan nila unta kadto nga panghitabo. “Kining panatiko, batan-ong Lalaki nga mitungha, nga mga trayntay-tres anyos ang panuigon ug . . . o traynta anyos ang panuigon, ug miadto didto ug namahayag og tanan nang matang sa mga Kahayag, ug may mikayab pa

kono nga mga Salampati. Ug, aba, kana gyu'y usa—usa ka kaulawan.” Miingon pa sila, “Natawo Siya sa dili-kinasal nga mga ginikanan, nag-angkon pa gyud nga Siya'y natawo kono sa usa ka ulay.”

<sup>44</sup> Dili ba angay nga nahibaloan unta nila nga miingon si Isaias, diha sa Isaias 9:6, “Alang kanato ang usa ka Bata natawo”? Dili ba angay nga nahibaloan pud unta nila nga miingon ang propeta nga si Isaias, “Usa ka ulay magasamkon”? Nahibaloan unta nila kining mga butanga. Apan, nakita n'yo, ang problema niadto mao nga, giaplikar nila kadto sa kung asa man nga panahong umalabot pa. Ug kini nga Lalaki, para kanila, wala kono mihaong sa maong kwalipikasyon. Apan giingnan Niya sila, “Susiha ninyo ang mga Kasulatan, kay naghunahuna man kamo nga diha Kanila makabaton kamo og Kinabuhing Walay Katapusan, ug Sila mao ang Mismong nagapanghimatuod sa Akong Mensahe.” Dili sa kung unsay gisulti sa kung kinsa man nga teologo; kondili sa kung unsay gisulti sa Dios, sa Kaugalingon Niyang Pulong, nga magakahitabo! Amen!

<sup>45</sup> Mao sa gihapon karon! Susiha ninyo ang mga Kasulatan, kay Sila Mao ang nagasulti kanato sa takna nga atong ginapuy-an, nagasulti kanato sa eksakto kung unsay magakahitabo niining adlaw. Sila Mao ang kinahanglan n'yong saligan, tungod Sila man Mao ang nagapanghimatuod sa Persona ni Jesus Cristo. Kay miingon ang Biblia, nga, “Siya mao sa gihapon kagahapon, karon, ug hangtud sa kahangturan,” tungod kay Siya man ang kapadayagan sa Pulong sa maong kapanahonan. Walay kalahian.

<sup>46</sup> Busa tungod lang sa pagpaminaw sa interpretasyon sa tawo, nakita na unta nila ang pagpanghimatuod sa Pulong sa Dios nga natuman, pero napakyas sila nga makita Kini. Tungod, nagakahitabo gyud kini sa tanang panahon, tungod naminaw man sila. . . Ug miingon si Jesus, “Sila'y mga lider nga buta.” Ug kung buta ang magaagak sa buta, unsa ma'y mahitabo kanila? Karon hinumdumi, ang Biblia nagtagna na nga kining eklesiastikal nga kapanahonan sa niining Kapanahonan sa Laodicea buta. Gipagawas nila Siya sa iglesia. Wala na'y uban pang kapanahonan, uban pang kapanahonan sa iglesia, nga si Jesus anaa na sa gawas. Kondili sa Kapanahonan sa Iglesiang Laodicea lamang, nga anaa na Siya sa gawas, nagapaningkamot nga makasulod og balik, “Nagatindog Ako sa pultahan ug nagapanuktok.” Angay unta nga anaa Siya sa sulod. Apan miingon Siya, “Tungod kay nagaingon ka, ‘Datu man ako, nagmauswagon, walay nakulang kanako,’ ug wala mahibalo, wala mahibalo nga ikaw diay buta, nga nagaagak sa buta usab, kabus sa espiritu, alaut, makaluluoy, hubo, ug wala mahibalo niini.” Daw sa unsa nga pag-. . . Kung hubo ang usa ka tawo diha sa dalan, makaluluoy, buta, ug nahibalo ka nga aduna siya'y igong pagsabot nga mahimo mo siyang sultihan nga siya'y

hubo, maningkamot gyud kini nga magbuhat og unsa man bahin niini. Apan pag-ilingolingo niya ang iyang ulo, moingon, “Dili ko modawat Niana. Si kinsa ka man para sultihan ako kung unsay akong pagabuhaton? Kabalo man ko kung asa ako nagabarug.” Karon, kung dili kaha kana usa ka makaluluoy’ng butang, wala ko kahibalo kung unsa. Ug eksaktong ingon niana kung unsay gisulti sa Dios niining Biblia nga mamahimong kahimtang sa iglesia, sa niining dautan nga kapanahonan karon mismo, sa kaulahiag kapanahonan sa iglesia nga atong gikinabuhian.

<sup>47</sup> Himatikdi, apan alang sa mga tawo, “Sa Akong mga gihigugma, Ako nagabadlong.” Karon, kung gibadlong kamo sa Ginoo, sa kung unsay inyong ginabuhat, nan biyai ninyo kini! Pahalayo kamo niini. “Sa Akong mga gihigugma, Ako nagabadlong.”

<sup>48</sup> Karon, ang makita ang Dios, karon, unsa kaha kung miingon kadtong mga Fariseo, “Kadali lang. Kana nga Lalaki naghatag kanato og medyo usa ka hagit, ingon Siya, ‘Susiha ninyo ang mga Kasulatan, kay diha Kanila naghunahuna man kamo nga makabaton kamo og Kinabuhing Walay Katapusan; Sila ang nagapanghimatuod Kanako.’ Maayo siguro nga susihon ko ang mga Kasulatan ug hibaloong kung unsay gitagna nga pagabuhaton Niya, kung si Kinsa Siya, kung unsay gitagna nga magakahitabo. Kinahanglan kong susihon ug hibaloong”? Imbis nga ingon niana, nangadto hinoon sila sa mga sacerdote ug nangutana kanila, “Unsa man Kini?” Nakita n’yo ang kalahian? Kinahanglan unta nga gibasa nila ang Pulong.

<sup>49</sup> Diha sa Mga Hebreohanon 1:1, miingon ang Biblia, “Ang Dios, sa nagkalainlaing mga panahon,” kana’y, “sa kaniadtong panahon ug sa nagkalainlaing mga paagi gisulat ang Biblia pinaagi sa mga propeta.” Karon matikdi ninyo, gisulat Niya ang Biblia sumala sa Kaugalingon Niyang gipili nga pamaagi. Kita n’yo? Karon, dili man Niya kinahanglan nga isulat Kini sa ingon-niana nga paagi, ni kinahanglan Niyang luwason ang tawo pinaagi sa Dugo. Dili pud Niya kinahanglan nga iwali ang Maayong Balita pinaagi og tawo; mahimo man Niyang tugotan ang adlaw o ang bulan o ang mga bitoon nga iwali ang Maayong Balita, mahimo man Niyang tugotan ang mga hangin nga laylayon ang Maayong Balita. Apan gipili gyud Niya ang tawo! Ug gipili pud Niya ang paagi kon diin moabot ang Iyang Pulong, ug kana mao’y pinaagi sa Iyang mga propeta nga gipili nang daan ug gitagana nang daan, ingon nga kabahin na sa Pulong sa Dios, nga ginahayag ang kapadayagan sa Iyang Pulong alang nianang kapanahonan ug alang nianang panahon. “Kay ang Pulong sa Dios nagaabot ngadto sa mga propeta lamang.” Wala Kini nagaabot sa teologo. Ipakita kanako ang Kasulatan. Nagaabot lamang Kini ngadto sa mga propeta. Dili makapamakak ang Dios. Busa gisulat sa Dios ang Biblia pinaagi sa gipili Niyang pamaagi, ug sa Kaugalingon Niyang gipili nga

mga propeta; dili mga propeta nga gipili og tawo, kondili mga propeta nga gipili gyud sa Dios.

<sup>50</sup> Dayon ang mga magtotoo Niini nagahulat sa katumanan sa kung unsay gisulti sa ilang propeta, ug mao man kana ang ilhanan nga sila'y mga propeta sa Dios. Tungod kay, una, sila'y mga dinihogan. Sunod, eksakto silang nagapabilin sa Pulong alang sa maong panahon. Mao kana ang iyang mga kredensiyal. Kita n'yo, nahisgotan na nato kana niadtong miaging Dominggo. Managpanungha ang daghang mini nga mga propeta. Ug gihatag pud nato ang mga paghulagway sa kung unsa nga si Balaam ug si Moises kaniadto, pareho silang mga dinihogan sa mao rang Espiritu, og miingon ang usa kanila, "Usa ra man kitang tanan. Adto ta og maghiusa, hiusahon nato ang atong mga kababayenan ug ang tanan. Aduna kami og maanyag nga mga dalaga dinhi, ug kamo nga mga lalaki umari kamo dinhi ug magkuha kamo og maanyag nga asawa. Okey lang kana, usa ra man kitang tanan ka katawhan, bisan pa man, mao ra nga kaliwat." Wala gayud sila gipasaylo sa Dios tungod niadto. Naminaw man sila niadto.

<sup>51</sup> Kita n'yo, ang kalibutan ug ang—ang mga tawo nagapangita gyud og usa ka diyutay'ng kalutsan, usa ka diyutay'ng tipasanan, usa ka diyutay'ng laktoran, apan wala gayu'y mga laktoran diha sa Pulong sa Dios. Ngani adunay usa ra ka Sukdanan. Kinahanglan mong tabason ang imong kaugalingon aron mohaum niana nga Sukdanan, dili nga maninguhang tabason ang maong Sukdanan aron mosibo kanimo. Kinahanglan buhaton kana sa tanan. Mao lang kana ang paagi nga aduna ang Dios sa pagbuhat niana.

<sup>52</sup> Himatikdi karon, nagahulat ang mga magtotoo nga mapamatud-an ang maong Pulong. Kita n'yo, wala Kini gisulat og tawo, kondili gisulat Kini sa Ginoong Dios, busa dili Kini libro sa tawo.

<sup>53</sup> Adunay moingon, "Usa lang man Kini ka karaang mga sinulat sa mga Hebreohanon." Mosulat kaha ang mga Hebreohanon og usa ka surat nga nagasaway sa ilang mga kaugalingon? Mahimo kaha niadtong maanindot nga nasulat sa mga Judeo, mga nagpakaingon ug mga hinashasan, isulat kaha nila ang mga kasal-anan nila mismo, nga nagakondena sa ilang mga kaugalingon? Dili gayud. Isugid ang kaugalingon nilang mga sala, kung unsa nga mipaingon sila sa pagsimba sa diosdios, kung unsa nga nakahimo sila og pakighilawas batok sa Pulong sa Dios? Dili, dili. Dili gayud nila kana isulti, kadtong mapasigarbohon nga nasud.

<sup>54</sup> Dili Kini libro sa tawo. Libro Kini sa Dios. Ug ang tawo nga nakakita sa mga panan-awon o nakadungog sa Tingog sa Dios, (sa makadaghang higayon) sila mismo wala makasabot niini, sa daghang mga sitwasyon. Kita n'yo? Dili tawo ang nagsulat sa Biblia. Ang Dios ang nagsulat sa Biblia. Dili Kini. . . Dili Kini



libro sa tawo. Libro Kini sa Dios. Kini ang mga hunahuna sa Dios nga gipahayag pinaagi sa mga ngabil sa tawo. Mao kana'y nakapahimo Niini nga Biblia. Ang hunahuna nga gilitok usa ka pulong. Ug sa sinugdan mao na ang Panghunahuna sa Dios, gipahayag Niya Kini pinaagi sa mga ngabil sa Iyang mga propeta ug gipamatud-an Kini pinaagi sa Iyang mga alagad. Kita n'yo? Himatikdi.

<sup>55</sup> Ang Dios ang nagahimo sa Kaugalingon Niyang pagpili, pinaagi og predestinasyon, gipili ang mga propeta alang sa matag kapanahonan. Himatikdi kini. Siya ang naghatag sa maong kinaiya sa niana nga propeta aron mohaum siya sa niana nga kapanahonan. Kita n'yo, Siya ang naghatag sa mga estilo niini, unsa man ang ginahimo niini. Giandam Niya siya kung siya ba'y mamahimong edukado o dili edukado. Gitino Niya ang mga gasa, ang pamaagi sa pagwali sa maong tawo, ang mga gasa nga mabatonan niya. Ug ang Mensahe alang niana nga kapanahonan, gitagana nang daan sa Dios nga mahitabo gyud kana ug wala na'y uban pang butang ang makapuli niini. Dili ko igsapayan kung unsa man kini, unsa pa ka daghan ang mga kalampanan nga hinimo sa tawo, wala gyu'y makapuli niini. Daan na Niyang gipili ang maong tawo, usa man kini ka tawong walay-hibangkaagan. Mahimo man nga gipili Niya siyang daan nga mamahimong lahi nga matang sa tawo. Bisan unsa pa man siya, gihatagan Niya siya og iyang kabutang, iyang-iyang gasa, gihatagan siya og iyang kinaiyahan, iyang pamaagi, ug unsa pa man, kung unsaon niya sa pagpahayag ang iyang kaugalingon, ug kung unsa man ang iyang pagabuhaton. Giandam gyud Niya ang maong tawo alang sa maong takna aron madani niya ang mga tawo sa maong takna. Husto. Ingon Niana ang ginabuhat Niya.

<sup>56</sup> Sa katapusan sa matag kapanahonan, sa diha nga ang iglesia mitipas na ngadto sa kalibutan ug sa kasal-anan, ug misalig na sa interpretasyon sa tawo mahitungod sa Pulong. Sama sa kaniadto pa, sila sa kanunay, pag-sa katapusan na sa kapanahonan, nagakasangpot ngadto sa dakung pagkalibog tungod sa ilang mga teologo ug mga pari hangtud nga kanunay na gyud kini nga pagkalibog. Kanunay na gayu'ng sayup ang ilang interpretasyon, wala ni usa ka higayon nga napakyas kini sa pagkahimong sayup. Ug wala gyud ni usa ka higayon usab nga napakyas ang Pulong sa Dios sa pagkahimong husto. Mao kana ang kalahian.

<sup>57</sup> Karon nakita n'yo, nga gisulat sa Dios ang Biblia, Siya Mismo. Karon, makasulti man ang Dios. Miingon si Moises nga nagpakigsulti kono ang Dios kaniya. Miingon si Jeremias, "Nagbutang Siya og mga Pulong sa akong baba." Ug makasulat pud ang Dios. Gisulat Niya ang napulo ka mga sugo pinaagi sa Kaugalingon Niyang tudlo. Nagsulat Siya kaniadto sa mga bungbong sa Babilonia. Ug, hinumdumi, nga diha lamang sa

Daang Tugon, duha ka libo ka higayon nga miingon ang mga propeta, “MAO KINI ANG GINAINGON SA GINOO!” Makapakigsulti gayud ang Dios, makasulat pud ang Dios. Sigurado. Halos nubenta porsyento sa Mateo, Marcos, Lucas, ug Juan, maoy mismong mga Pulong sa Mismong Dios, nga si Jesus Cristo nga nagapakigsulti. Busa, kung makasulat man ang Dios, kung makabasa man ang Dios, kung makasulti man ang Dios, dili ba Niya usab mahimo nga ipabuhat sa uban ang mao rang butang? Dili ba miingon Siya kang Moises, “Kinsa man ang nagbuhat sa tawo nga mamahimong amang o kinsa ba ang naghatag kaniya og kaarang sa pagsulti?” Gisulat sa Dios ang Biblia pinaagi sa mga propeta, mao’y Iyang paagi sa pagbuhat niini.

<sup>58</sup> Karon sa matag higayon nga nagakalibog ang iglesia (ug daan nang nahibaloan sa Dios nga mamaingon niana sila, tungod nga daan na man Niyang nahibalon ang tanang mga butang), busa aduna Siya og Iyahang propeta nga giandam alang niana nga kapanahonan, aron pagatawgon ang Iyang mga pinili pinaagi sa Iyang gipanghimatud-an nga Pulong sa mga ilhanan ug mga katingalahan, ug sa pagpanghimatuod sa Iyang Pulong, “nagapanghimatuod sa Pulong uban sa naganunot nga mga ilhanan,” sama sa Iya nang gisaad. Ginahatag Niya ang matuod nga interpretasyon pagkahuman nga gipanghimatud-an na ang maong propeta mismo.

<sup>59</sup> Ang tanan gawas niadtong, mga pinili kang kinsa gikapadala ang propeta, gikapungtan ang maong propeta. Karon, susiha n’yo ang matag panghitabo ug tan-awa kung husto ba kana o dili. Sa mga niadto lang nga gikapadala Siya! “Sa mga Iya mianhi Siya, ug ang mga Iya wala modawat Kaniya. Apan ang tanan nga midawat Kaniya, kanila naghatag Siya og kagahum sa pagkahimong mga anak sa Dios.” Himatikdi, walay...sa matag pagsusi sa Pulong, sa matag panghitabo, ug sa katapusan sa matag kapanahonan o sa sangkoanan o sa kinasang-an niini, ingon nga giwali ko na ang mahitungod niini sa makadaghan nang higayon.

<sup>60</sup> Tan-awa n’yo ang kapanahonan ni Noe, sa sangkoanan kaniadto sa wala pa ang paghukom. Unsa ma’y nahitabo? Si Noe, ang kaugalingon niyang pamilya lang ang mitoo sa niini nga tawo. Gisaway siya sa tanang uban pa kanila. Ug gilaglag ang tibuok kalibutan.

<sup>61</sup> Sa mga adlaw ni Abraham usab, ang grupo lamang ni Abraham ang mitoo. Sa diha nga miadto ang duha ka Manulonda ug nagwali ngadto sa Sodoma, si Lot lang ug ang iyang asawa ug duha ka mga anak nga babaye ang nanggawas, ug ang asawa niya nahimo pang usa ka haligi nga asin.

<sup>62</sup> Sa mga adlaw ni Moises kaniadto, ang mga pinili lang pud sa Israel ang nanggawas. Ug gikapungtan gyud siya ni Faraon.

63 Sa mga adlaw ni Elias, ang tanan (halos) gawas niadtong pito ka libo ka mga tawo, gikapungtan siya sa tanan kanila, sa tibuok nasud.

64 Sa mga adlaw pud ni Jeremias, aba, gilabayan nila siya og hilaw nga mga prutas, ug gitawag siya nga usa ka panatiko, tungod nga nagahigda siya nga patakilid sa pipila ka mga adlaw, ug diha sa pikas kilid na pud, ug—ug nagkuha og mga butang ug naghimo og mga simbolo. Gikapungtan nila siya.

65 Ang propeta nga si Isaias, gikondena niya og ayo kadto nga kaliwat hangtud nga ilang giputol siya pinaagi og paggabas. Husto.

66 Si Juan Bautista. “Usa siya ka ihalas nga tawo didto, usa ka nagasiyagit nga buang.”

Ang tanan gayud gawas—gawas niadtong mga tinun-an nga gipresentar niya ngadto kang Jesus Cristo ingon nga usa ka iglesia! Ingon niana. Nag-andam si Juan kaniadto og usa ka katawhan. Pila man ang atua kaniya? Mahimo ra ninyong maihap sila sa duha ka mga tudlo... sa duha ka kamot, sa inyong mga tudlo, kung pila ra ang gipresentar ni Juan ngadto kang Jesus sa dihang miabot Siya. Karon, unsa kaha sa Iyang ikaduhang Pagbalik? Hunahunaa ninyo kini.

67 Apan sa diha nga nakita sa tinuod nga mga magtotoo sa Biblia ang Pulong nga dayag kaayo nga gipanghimatud-an alang sa maong kapanahonan, nanagpanoo sila. Wala gyu’y paagi nga mapugngan sila gikan Niini, sa pag-too Niini. Giselyohan pa gani nila ang ilang pagpamatuod pinaagi sa ilang dugo. Nanagpanoo sila Niini. Para gyud Kini kanila kaniadto, nga mga gipili-nang-daan, alang niadto nga kapanahonan nga nakakita ug mitoo.

68 Wala gayud Kini makita sa uban; sila’y mga buta. Karon, moingon mo, “Dili sila makakita Niini.” Karon, sama ni Balaam, nganong dili man Kini makita ni Balaam? Usa man siya unta ka propeta, dinihogan. Nganong dili man Kini makita ni Faraon? Sa diha nga nakita niya ang kamot sa Dios nga mikanaug ug namuhat og mga milagro didto, gipagahi lang hinoon ang iyang kasingkasing. Husto ba kana? Nganong dili man Kini makita ni Dathan, nga usa ka Judeo mismo? Atua siya mismo didto, nga mitabok ngadto sa Dead Sea, ug nagakaon og manna sa matag gabii, nga lab-as pa nga nangahulog, ug sa gihapon wala makakita Niini. Nganong wala man Kini nakita ni Korah? Nganong wala man Kini nakita ni Caifas? Siya man unta ang pangulong relihiyosong tawo sa kalibutan niadtong panahona. Nganong wala man niya nakita nga kadto mao ang Mesias? Nganong wala man Kini nakita ni Judas? Atua si Judas nga kauban nila mismo, nga nagpakig-uban kanila, og namuhat pud og mga milagro uban kanila. Apan kinahanglan gayud nga mamatuman ang Pulong. Nagaingon ang Biblia nga gipatungha

silang aron tumanon kana nga katungdanan. Gipatungha sila alang niana nga katuyoan. Tinuod kana. Nagaingon niana ang Mga Taga-Roma 8.

<sup>69</sup> Karon mahimong makita sa mga magtotoo ang Pulong nga nahimong unod sa ilang henerasyon, ang Dios nga nagapakigsulti. Karon, kadtong tinuod og matuod nga mga magtotoo, kadtong pito ka libo (o pito ka gatus ba kadto?) sa mga adlaw ni Elias kaniadto. Husto ang pito ka libo. Sa mga adlaw ni Elias, adunay pito ka libo ka mga tawo sa mga duha o tulo ka milyon, ang nakakita nga husto Kadto. Wala ra gani ni usa sa usa ka gatus sa mga tawo, halos. Apan nakita nila nga husto Kadto. Nakita nila ang Dios nga napadayag. Ngani kadtong tigulang nga balo kang kinsa gipadala si Eliseo, miadto siya aron manguha og mga sanga sa kahoy, aron magbuhat og usa ka tinapay, ug igo lang gyud nga makabuhat og usa ka tinapay para kaniya ug sa anak niyang lalaki, ug dayon mamatay na. Apan tan-awa si Elias, ingon siya, “Buhati ko og usa, una. Kay, MAO KINI ANG GINAINGON SA GINOO, ang tadyaw sa harina dili mahutdan ni mamalhan man ang tibud-tibud hangtud sa adlaw nga ang Ginoong Dios magapaulan sa ibabaw sa yuta.” Sa walay pagduhaduha, milakaw dayon siya aron magbuhat og tinapay ug ihatag kini ngadto kaniya. Miingon, “Buhati una ako, ug pagkahuman lumakaw ka og pagbuhat og usa para kanimo ug sa anak mong lalaki.” Kay, nadungog niya kadto nga tawo, ug nagpaabot siya kaniya; usa siya ka gipili-nang-daan nga binhi.

<sup>70</sup> Daghan kanila ang miingon, “Anaa na pud kanang tigulang nga sapoton. Gitunglo kita sa Dios tungod niya,” hinumdumi, si Elias. Miingon, “Ikaw mao ang nagsamok sa Israel.”

<sup>71</sup> Ingon siya, “Ikaw mao ang nagsamok sa Israel.” Kita n’yo kung si kinsa’y Dios. . . Kang Kinsa man nga Pulong ang Iyang ginapanghimatud-an? Ang Kaugalingon Niyang Pulong.

<sup>72</sup> Karon nagaingon ang Biblia nga gipatungha sila alang niini nga katuyoan, apan sa dihang. . . ang—ang dili-magtotoo. Apan karon sa diha nga mahimong makita sa matuod nga magtotoo ang Pulong alang sa maong kapanahonan nga nahimong unod, ang Dios nga nagapakigsulti pinaagi sa mga ngabil sa tawo ug dayon eksaktong ginabuhat kung unsay giingon Niya nga Iyang pagabuhaton, mao na kana!

<sup>73</sup> Karon bantayi n’yo ang uban pa niini. Ayaw mo pagtan-aw og mga ilhanan. Kay kung motan-aw kamo og mga ilhanan, malimbongan gyud kamo sa ingon ka sigurado sama sa kalibutan. Manungha ang mini nga mga propeta ug magpakita og mga ilhanan ug mga katingalahan nga mao’y mopahisalaag sa mga Pinili kung mahimo pa. Tan-awa n’yo ang Pulong. Tan-awa kining mga sacerdote, kining mga propeta, Hebreohanong propeta nga nagatindog didto. Si Zedechias nga dunay dagku kaayang mga sungay, ug nagaingon, “Usa ako ka propeta nga

gitagana-nang-daan-sa-Dios.” Tinuod kana. “Aduna ako’y tulo ka gatus ug nubentay-nuebe nga ania mismo kauban ko, ug anaa kanamo ang Balaang Espiritu, nga nagapanghimatuod ug nagaingon nga kanang yutaa atoa gayud. Manungas kita ug kuhaon kana. Ug pinaagi niining mga sungay, Ahab, papahawaon mo ang kaaway pahilayo sa atong yuta, kay gihatag na sa Dios kanato ang maong yuta.”

<sup>74</sup> Tan-awa n’yo kadtong relihiyoso nga tawo, maayo nga tawo, nga si Josaphat, miingon, “Wala ka na ba’y usa pa?”

<sup>75</sup> “Usa pa? Aduna ma’y upat ka gatus nga nagkauyon!” Ingon siya, “Oo, aduna pa ma’y usa dinhi, apan gikapungtan ko siya.” Ingon pa, “Pirmi man gud niya nga ginabadlong kaming tanan ug ginasultihan kami kung unsa kami ka dakung makasasala, ug tanan na.” Ingon pa, “Gikapungtan ko gayud siya! Siya, siya mao si Micheas, nga anak ni Imlah.”

<sup>76</sup> Ingon siya, “Oh, dili unta magsulti ang hari sa ingon. Sige ipakuha siya ug atong paminawon kung unsay iyang igasulti.”

<sup>77</sup> Busa gidala nila siya didto. Ingon siya, “Hatagi ako karong gabhiona ug tan-awon ko kung unsay igasulti sa Ginoo mahitungod niini.”

<sup>78</sup> Ingon si Ahab, “Ginamandoan ko ikaw, ayaw ko sultihi og unsa man kondili kamatuoran lamang.”

<sup>79</sup> Ug miduol ang maong tawo, miingon, “Karon, kung gusto mo pang makabalik sa maayong pagpakig-fellowship, isulti lang ang sama sa ginasulti sa tanang uban pa kanila.”

Ang ingon ni Micheas, “Igasulti ko lang kung unsay ginasulti sa Dios.” Kita n’yo?

<sup>80</sup> Pagkasunod buntag, migawas sila. Gisul-ob sa mga hari ang ilang mga kupo, milingkod sa ganghaan, ang tanang bantugang mga tawo. Atua pud didto ang propeta. Giingnan siya, “Karon, panatiko, unsa ma’y igasulti mo mahitungod niini?”

<sup>81</sup> Ang ingon, “Tumungas kamo.” Ingon pa, “Apan nakita ko ang Israel nga nagkatibulaag sama sa mga karnero nga walay magbalantay.”

<sup>82</sup> Iyang gisag-. . . gigunitan ang iyang kamot ug gisagpa siya sa baba. Gisagpa sa usa ka propeta ang maong propeta usab diha sa baba. Karon, nagatindog kadtong duha ka dinihogan nga mga propeta didto, nanagpropesiya, upat ka gatus batok sa usa, daw sa kusgan kaayo kadto kon tan-awon. Karon, diha sa panon sa mga magtatambag dili gyud pirlinging adunay kasigurohan. Nagaagad kini kung asa man sila. . . mahitungod ba sa kung unsa ang ilang ginatambag, og kung unsa ang ilang tambag. Walay kasigurohan para sa hari didto, ug gisaligan niya ang maong panon nga husto ang ilang pagpanambag. Apan kung mihunong lang unta siya ug gibuksan ang basahon nga linukot ug gitan-aw kung unsa gayud ang gisulti na ni Elias.

<sup>83</sup> Kung ingon-ana, wala na unta'y masulti og unsa man si Micheas, dili niya mahibal-an, kung pasayloon kaha siya sa Dios tungod niadto. Apan una, ingon nga usa ka propeta, miadto siya sa Dios aron hibaloon kung unsay igasulti sa Dios. Ug hingsayran niya kung unsay gisulti sa Dios. Ingon siya, "Nakita ko ang Dios nga nagalingkod sa usa ka trono, ug ingon Niya . . . ang tanan Niyang mga magtatambag sa Langit nagkatigum palibot Kaniya, miingon, 'Kinsa ba ang mahimo Natong sugoon aron monaug didto ug aghaton si Ahab sa pag-adto didto, aron nga mamatuman Nato ang propesiya nga gisulti na mahitungod kaniya?'"

<sup>84</sup> Kita n'yo, ang propesiya, nga gisulti na ni Elias, "Ang mga iro magatilap sa imong dugo."

<sup>85</sup> Ug busa miingon siya nga iyang "nakita ang usa ka bakakon nga espiritu nga misaka gikan sa ubos, miadto, miadto sa atubangan sa Dios, nag-ingon, 'Monaug ako ug mosulod diha sa iyang mga propeta, sa mga propeta ni Ahab, ug papanagnaon sila og usa ka bakak.'"

<sup>86</sup> Karon, hingsayran na sa Dios nga kadto nga mga kalalaken-an mapasigarbohon kaayo ug puno gayud sa teolohiya nga nagdahum sila nga ang tanan kanila'y husto. Wala gyud nila namatikdan ang Pulong alang sa ilang panahon. Busa miingon ang Dios, "Molampus ka; lakaw og kanaug na." Ug sa diha nga gisulti na kadto ni Micheas, kadtong nagpahinungdan kanila nga nanagna diay sila ilalum sa usa ka dautang espiritu. Sigurado gyud nga giibot nila ang kabli sa telepono, o gipalong ang radyo, o nagbuhat og unsa man; pagkadungog nila Niadto nga ginabatokan sila, nanindog ug nanggawas sila. Apan tan-awa kung unsay nahitabo. Karon, kinahanglan ni Micheas nga susihon ang iyang panan-awon sumala sa sinulat nga Pulong, mao nga nakahibalo siya.

<sup>87</sup> Giingnan siya, "Pagmoabot ako . . . Ibalhog kanang tawhana sa bilangoan, hatagi siya og mga tubig sa kagul-anan ug tinapay sa kagul-anan. Sa akong pagbalik, ako na ang bahala kaniya."

<sup>88</sup> Ang ingon niya, "Kung makabalik ka pa, ang Dios wala magsulti kanako." Dinha siya nakahibalo nga ang iyang panan-awon tukma gayud sa matag Pulong alang niadtong panahona. Oras na kadto ni Ahab.

<sup>89</sup> Igsoong lalaki, igsoong babaye, kini na ang takna ug panahon sa pagtawag pahigawas sa Babilonia. Ania na ang pang-gabii nga mga Kahayag. Paglakaw kamo diha sa Kahayag samtang may kahayag pa. Himatikdi, nakita sa mga magtotoo kaniadto ang Pulong nga napadayag ug gitooan nila Kini. Miingon si Jesus, "Ang Akong mga karnero nakaila sa Akong Tingog, sa Akong Pulong, sa Akong mga ilhanan sa kapanahonan. Sa usa ka mini dili sila monunot."

<sup>90</sup> Karon balikan nato ang atong teksto, kay nakita ko nga napalayo na ko. Gusto ko gayud nga hatagan og punto ang mahitungod sa linya sa pagpaampo. Balikan nato ang maong teksto karon nga atong gihisgotan, dinhi sa makadiyut lang. Bueno, mamahitabo kini pag-usab sama sa ginabuhat niini kanunay, sama ra gihapon kaniadto.

<sup>91</sup> Gipadala sa Dios ang Iyang propeta, nga si Juan, sama sa gikaingon na sa Iyang Pulong, nga gisaad diha sa Malaquias 3, “Tan-awa, Akong ipadala ang Akong mensahero sa atubangan Ko, aron sa pag-andam sa dalan.” Mao kana mismo ang gipamatud-an ni Juan. Ug atong nahibaloan usab, diha sa Isaias 40:3, nga miingon si Isaias, “Adunay tingog sa usa ka propeta, nga magasinggit sa kamingawan, ‘Andama ninyo ang dalan sa Ginoo.’” Kita n’yo? Ang tanan niadto nga mga propesiya! Ug—ug tan-awa, matikdi sa gilayon, gipaila siya sa Kasulatan.

Sa pagsulti nila, “Si kinsa ka man? Ikaw ba ang Mesias?”

Ingon siya, “Dili.”

“Ikaw ba si Jeremias? Ang mga propeta, o usa kanila?”

<sup>92</sup> Ingon siya, “Dili. Apan ako mao ang tingog nga nagasinggit sa kamingawan, sa gikaingon na ni propeta Isaias.”

<sup>93</sup> Sa hunahuna n’yo kaha nga motoo sila niadto? Dili, sir. Ngano man? Dili man siya naggikan sa ilang iglesia. Dili man siya ilang. . . Kita n’yo, miadto siya sa kamingawan sa edad nga nuebe anyos, ug migula sa edad nga traynta na. Halangdon kaayo ang iyang mensahe nga mo-eskwela pa siya sa usa ka eskwelahan sa teolohiya; siya man ang magpaila sa—sa Mesias. Ug tingali danihon pa siya ni kinsa man *paingon-niini* nga dalan ug *paingon-niana* nga dalan. Ug mao nga gipadala siya sa Dios sa kamingawan, human nga namatay ang iyang amahan, nga si Zacarias. Ug usa kini ka sacerdote, apan wala niya gisunod ang pangatungdanan sa iyang amahan.

<sup>94</sup> Tungod nga, ang mga propeta wala man nagagikan sa ingon-nianang mga butang. Nagagikan sila sa malisud nga mga lugar, sa kamingawan. Walay tawong nasayod kung asa sila gikan, o kung giunsa nila pagtungha, o unsa man mahitungod sa ilang kaagi. Basta na lang sila motungha ug iwali ang Pulong, ug kuhaon dayon sila sa Dios, ug molakaw na sila; ginakondena ang maong henerasyon, ug mopadayon ngadto sa Iyang Pulong, magahulat alang sa maong dakung adlaw.

<sup>95</sup> Wala siya kaniadto gitooan sa iglesia, tungod kay wala man sila nakaila kaniya. Wala sila’y rekord mahitungod sa iyang pagkaordena diha sa ilang mga libro, ug mao nga gisalikway nila siya. Kita n’yo, wala nila toohi ang gipanghimatud-an nga Pulong sa Dios, nga dayag kaayo, letra por letra. Kita n’yo? Malaquias 3, duha ka mga Kasulatan nga nagapamatuod kaniya, Malaquias 3 ug Isaias 40:3. Kita n’yo, kanang duha ka mga Kasulatan parehong naghigot mahitungod sa usa ka tawo nga

moabotay, nga magaadam sa dalan sa Ginoo. Anaa kaniya ang tanang ilhanan niini.

<sup>96</sup> Siya'y mamahimong usa ka propeta. "Ipadala ko kaninyo si Eliseo." Ug atua siya didto, sa tanan niyang gansangon nga pamaagi. Bantayi n'yo kung daw sa unsa nga ang iyang kinaiyahan miawat gyud kang Elias. Si Elias kaniadto usa ka tawo nga nahigugma sa kamingawan, mao man usab si Juan; ang maanaa sa gawas pirmi. Dili siya usa ka tawong may maayong pamatasan, siya'y usa ka tawong salbahison.

<sup>97</sup> Matikdi usab, nga si Elias kaniadto usa ka madulomtanon sa mga babaye, gisultihan niya si Jezabel mahitungod sa tanang pagpamantal niini, ug kung unsa ang puede angkonon ug ang dili puede angkonon. Mao usab si Juan. Gipaninguhaan ni Jezabel nga patyon si Elias, og nanumpa sa iyang mga diosdios nga punggotan niya og ulo si Elias. Mao pud si Herodias. Kita n'yo?

<sup>98</sup> Kanunay tan-awa ang ilang mensahe, tan-awa kung unsay gipangbuhat nila. Karon atong nahibaloan nga kung gitan-aw lang unta sa mga tawo ug nakita kung unsay gisulti sa Biblia, ug gibantayan nila ang kinaiyahan sa maong tawo ug kung unsa siya ka hingpit nga nagakatakdo sa mga Kasulatan ug tanan na, nailhan nila unta nga mao na kadto siya. Mga tunga sa dosena ang nasayod niadto. Husto kana. Dili mosobra sa tunga sa dosena ang nakahibalo niadto. Nangadto sila aron paminawon siya, apan wala sila mitoo Niini. Kita n'yo? Ngano man? Tungod wala man sila mitoo sa ilhanan sa propesiya para sa ilang takna.

<sup>99</sup> Himatikdi, gikataw-an nila siya, gitawag siya nga usa ka "nagasiyagit, mabangis, nga panatikong walay hibangkaagan og walay iniskwelahan, 'hit, haint, tote, carry, fetch,' og uban pa." Sama ra gihapon kaniadto gihukman nila siya tungod sa iyang kawalay-edukasyon. Gihukman nila siya tungod sa iyang gramatika, tungod sa iyang pamisti. Aduna siya'y panit sa karnero nga nakaputos kaniya, ug nakabakus pa og panit sa kamelyo, og siya'y balhiboon kaayo. Nagalakaw didto sa mga tubig; walay iglesia, walay lingkoranan sa iglesia, walay nagapakigtambayayong kaniya; dili nila madawat ang ingon-niadto; ginasimba hinoon nila ang dios nga iya sa kalibutan. Kita n'yo?

<sup>100</sup> Wala ko ginapasabot nga wala na'y mini nga mga propeta ang manungha, sama ni Jambres ug ni Jannes. Apan ang kinahanglan n'yong buhaton, mao'y susihon ang lintunganay nga mensahe pinaagi sa Pulong, dayon masabtan n'yo kini; kung unsa na kini nga kapanahonan, ug kung unsa ang gipropesiya alang niana nga kapanahonan.

<sup>101</sup> Mao nga ang propesiya ni Juan gipanghimatud-an sumala sa Mismong pamaagi sa Dios. Bantayi kung unsa gayud ka hingpit. Miingon ang Biblia, "Ang Pulong sa Ginoo nagaabot ngadto sa propeta." Ug si Jesus mao ang Pulong. Ug nagapropesiya si



Juan mahitungod sa katumanan sa pag-abot sa Pulong; ug si Jesus, ang Pulong, miabot ngadto sa propeta, diha sa tubig. Oh, pagkaanindot! Daw sa unsa nga dili-masayup ang . . . Kita n'yo? Usa ka talagsaon nga butang ang Pulong niadtong panahona. Ania nagaabot ang propeta, nagaingon, "Ako mao ang tingog sa Pulong."

Ang ingon nila, "Unsa ma'y kinahanglan namong buhaton?"

<sup>102</sup> Ingon siya, "Dili ako takus bisan sa pagtangtang sa Iyang mga sandalyas. Apan adunay Usa nga nagatindog sa inyong taliwala, dinha, Siya mao'y Bugtong magabautismo kaninyo sa Espiritu Santo ug Kalayo. Ang Iyang nigong-paliran anaa na sa Iyang kamot, ug Iyang pagahinloan pag-ayo ang Iyang giukanan, ug pagasunogon ang mga uhot pinaagi sa kalayo nga dili arang mapalong, dalhon ang trigo ngadto sa dapa." Oh, grabe nga propeta! Miingon si Jesus nga wala pa'y tawo nga natawo sa babaye nga ingon ka halangdon sama kaniya, hangtud niadtong panahona. Oh, grabe nga pagpangandak! Nasayod gyud siya kung asa siya nagabarug! Nasayod siya sa tukma gayud. Nadungog niya ang Dios, ug eksaktong tukma kadto sa Pulong, mao nga wala niya igsapayan kung unsa ma'y gisulti sa mga tawo. Giwali niya Kadto ug gipropesiya niya Kadto, bisan pa man. Ug bantayi, sa diha nga ginabarugan sa usa ka tawo kung unsa ang Kamatuoran, nan obligado ang Dios nga panghimatud-an sa niana nga tawo ang Kamatuoran.

<sup>103</sup> Sa diha nga miadto si Moises didto sa Egipto, ug miingon, "Atua ako sa kamingawan, ug nakita ko ang usa ka kahoy nga nagakalayo, ug wala kadto nagakaugdaw. Miduol ko sa maong kahoy, ug, sa pagduol ko, adunay usa ka dakung Haligi nga Kalayo nga nagapaibabaw didto. Ug miingon ang usa ka Tingog, 'AKO MAN ANG MAO AKO.' Ug giingnan Niya ako nga dalhon kini nga sungkod ug moanhi dinhi ug buhaton ang ingon-niining mga milagro, ug pagapanghimatud-an sa Dios ang Iyang Pulong." Gituy-od niya ang iyang sungkod, og dihay nanungha nga mga pulgas ug mga langaw, ug kangitngit ug uban pa. Ug dayon aron panghimatud-an kadto nga propeta, gidala Niya ang mga magtotoo ngadto mismo sa maong bukid, ug mikanaug ang Dios sa porma sa mao gihapong Haligi nga Kalayo, didto sa mao ra nga bukid, ug gipamatud-an nga kadto mao'y husto.

Karon tan-awa kung unsay Iyang gibuhath niining panahona. Eksaktong mao sa gihapon.

<sup>104</sup> Karon, nagaabot ang Pulong ngadto sa propeta ug ginapanghimatud-an siya nga mao ang matuod, ang mismong tawo nga gikasulti sa mga Kasulatan nga mamahimong propeta. Sa pagdali karon. Apan, usab, miabot si Jesus sa sa porma nga lahi sa ilang hinimo'g tawong interpretasyon mahatungod sa maong propesiya. Gihubad sa tawo kung unsa kini. Mao gayud. Nagdahum ang mga Presbyterian nga mamahimong sila kadto.

Bantayi sa dihang nagabuhat ang Dios og unsa man, bantayi ang matag uban pang organisasyon nga motungha na lang nga ginaawat-awat na kanang usa. Oo, ingon na niana kini sa una pa. Aduna sila og Jambres ug Jannes sa bisan asa. Matikdi, mosulti sila og bahin ra sa Pulong. Apan, sumala sa Pulong sa propeta, matag Letra gayud!

<sup>105</sup> Napalagpas usab nila kini, sama ra gihapon kaniadto, gitawag Siya nga usa ka manghihimalad, “usa ka yawa; Beelzebub,” ug miingon pa nga gihimo Niyang Dios ang Iyang Kaugalingon, nga unta gihibalo usa’ nila, pinaagi sa ila mismong Biblia, nga Siya mao ang Dios.

Himatikdi, gipropesiya na Siya ni Isaias kaniadto, Isaias 9:6, miingon, “Ang Iyang Ngalan pagatawgon Ang Dios nga Makagagahum, Ang Amahan nga Walay Katapusan.” Wala na’y dugang pa nga mga amahan human niana, tungod nga Siya man ang unang Amahan sa sinugdan, Siya lang ang Amahan; ang ingon, “Dili kamo magtawag kang bisan kinsang tawo dinhi sa yuta nga, ‘Amahan,’ bisan, human niana.” “Siya ang—Ang Dios nga Makagagahum, ug Ang Amahan nga Walay Katapusan, Ang Magtatambag, Ang Principe sa Pakigdait.” Oo.

<sup>106</sup> Karon, gibuhay nila Kaniya ang tanan nga nahisulat na sa mga propeta nga ilang pagabuhaton, sama ra sa ginabuhay nila dinhi niini mismong Kapanahonan sa Laodicea, gipagawas Siya sa iglesia. “Buta, hubo, ug wala mahibalo niini.” Kung unsa gayud ang gisulti sa propeta, sa propeta sa Biblia. Gibutahan sa mga tradisyon sa tawo, gipagawas nila Siya, ang Pulong pagawas sa ilang mga iglesia, sama ra kaniadto, maingon sa gipropesiya na mahitungod kanila.

<sup>107</sup> Matikdi karon, sa gilayon ha. Ayaw n’yo sipyata kini karon. Ania ang maong teksto, kung giunsa ni Jesus sa pagpaila ang Iyang Kaugalingon ngadto niining duha ka mga tinunan nga Siya mao ang ilang Mesias! Karon, magtan-aw ang tanan dinhi. Ug sa tibuok nasud, ayaw n’yo sipyata kini karon. Ginapaninguhaan gyud namong isulti kaninyo nga ang Biblia mao ang Pulong sa Dios, nga gisulat sa Dios Mismo, pinaagi sa mga ngabil ug sa paggamit sa tawo. Makasulat ang Dios, Mismo. Makasulti ang Dios, Mismo. Mahimo sa Dios kung unsa ma’y gustohon Niya, apan gipili Niya ang tawo sa pagbuhay niini tungod kay ang tawo nga misulat Niini kabahin man sa Dios. Busa, Dios ang nagsulat sa Biblia. Wala gani makahibalo ang maong mga tawo kung unsay ilang ginasulat, sumala sa kaugalingon nilang tawhanong panghunahuna. Tingali’g wala sila miuyon Niini, apan gisulat nila Kini. Wala sila’y mahimo. Miingon ang Biblia, “Ang mga tawo sa kanhing panahon, minandoan sila sa Espiritu Santo!” Gipalihok sa Dios ang ilang mga kamot, gipalihok ang ilang mga mata diha sa mga pananawon. Dili sila makasulti og unsa man gawas sa kung unsay ilang nakita. Dili na sila makasulti og unsa man, tungod Siya na ang

may bug-os nga pagkontrolar sa ilang dila, tudlo, ang matag bahin sa ilang lawas bug-os gayu'ng anaa sa pagkontrolar sa Dios. Dili ikatingala nga miingon ang Biblia nga sila'y mga dios, sila'y kabahin sa Dios! Si Cristo man ang kahupnganan sa Dios.

108 Matikdi kung giunsa paghimo ni Jesus, ang Pulong, nga makahibalo kining duha ka masulob-on nga mga tinun-an nga Siya mao ang ilang Mesias, ang Mesias, ang gisaad nga Pulong. Matikdi ninyo kung unsa ang gibuhat Niya, mibalik Siya sa propesiya. Matikdi, “Mga tawong buangbuang, mga maluya sa pag-too sa tanang gisulat sa mga propeta.” Karon, wala Siya miingon, “Bueno, unsa, unsa ma'y ginaingon sa iglesia mahitungod niini?”

109 Gisuginlan nila Siya sa maong istorya. Hingsayran man nila ang tanang mga panghitabo nga nahitabo. Masulob-on gyud silang tanan. Misugod sila nga sultihan Siya, “Usa Ka lang ba ka dumuloong dinhi, o wala lang gyud Ka mahibalo kung unsay nahitabo didto sa Jerusalem?”

110 Ingon Niya, “Mahitungod sa unsa?” nga mora'g wala gyud Siya nakahibalo. Kita n'yo, nagabuhat Siya og mga butang usahay aron lang makita kung unsay pagabuhaton mo mahitungod niini. Kita n'yo? Miingon, “Unsang mga butanga? Si kinsa man kana? Unsa diay nahitabo?”

111 “Usa Ka lang ba ka dumuloong?” Ug nakig-estorya na diay sila sa mismong Tawo nga gikauban nila sulod sa tulo ka tuig ug tunga, ug wala gyud sila makaila Kaniya.

“Unsang mga butanga? Unsa ma'y nahitabo?”

112 “Bueno,” ang ingon nila, “Si Jesus nga Nazaretnon, nga usa ka Propeta. Wala gyu'y pagduhaduha sa among hunahuna. Siya'y gamhanan sa Pulong ug sa buhat sa atubangan sa tanang tawo. Nakita namo Siya nga namuhat og mga butang nga nagpaila Kaniya nga mao ang Propeta sa Dios alang niini nga kapanahonan. Nasayod kami niana. Ug nagtoo kami nga Siya ang mamahimong Manluluwas, nga Iyang pagaluwason ang Israel.”

113 Dayon milingi Siya ug miingon, “Kamong mga buangbuang, mga maluya og kasingkasing sa pag-too nga ang tanang giingon sa mga propeta mahitungod Kaniya dili mamahitabo?” Kita n'yo? Bantayi Siya karon nga nagabalik sa propesiya. Daw sa unsa nga pagbadlong sa mga magtotoo, nga nagaangkon nga nagatoo kono sila Kaniya!

114 Matikdi kung giunsa Niya paghisgot niini. Wala gyud Siya diretsong nagpaila ug miingon, “Ako mao ang inyong Mesias.” Mahimo man Niya unta buhaton kadto, kay Siya mao man. Apan matikdi nga gipaila Niya ang Iyang Kaugalingon diha sa Pulong, aron nga mahibaloan nila. Kung diretso Niyang gisulti kadto, mahimo ra man Niya unta nga isulti kadto pero dili na mamaingon niana; apan sa diha nga padayon Siyang nagalakaw

ug misugod sa paghisgot bahin sa tanang gisulti sa mga propeta mahitungod Kaniya, ug ilang nakita kadto, mao nga maila na nila sa ilang mga kaugalingon mismo, kung sila'y mga anak gayud sa Dios. Apan gitawag Niya ang ilang pagtagad ngadto sa kung unsay gisulti nang daan ug gikaingon sa mga propeta nga kinahanglan tan-awon sa panahon nga ang Mesias, ang Iyang kapanahonan, igapadayag na. Siya, sama ni Juan, gitugotan ang Pulong, ang Biblia, nga maoy magpaila sa ilang Mensahe. Buhaton kana sa kinsa mang tinuod nga propeta. Oo. Wala Siya diretsong nagpaila ug miingon, "Ako mao Siya. Ako..." Dili ingon-niana ang tinuod nga propeta sa Dios. Kita n'yo? Apan miingon Siya, "Baliki ninyo ang mga Kasulatan." Kita n'yo, wala gyud Siya nagapakyas sa Iyang pamaagi sa pagbuhat niini. Kita n'yo?

Ingon nila, "Nakaila kami kang Moises."

<sup>115</sup> Ingong Siya, "Kung nakaila kamo kang Moises, nakaila unta kamo Kanako." Ingong Siya, "Kay nagsulat man si Moises mahitungod Kanako." Ingong pa, "Susiha ninyo ang Kasulatan, diha Kanila naghunahuna man kamo nga makabaton kamo og Kinabuhing Walay Katapusan, ug ang Kasulatan mao ang nagapamatuod Kanako. Lakaw ug susiha n'yo ang Kasulatan ug tan-awa kini."

<sup>116</sup> Ania Siya nga wala gayud ginausab ang Iyang pamaagi sa pagbuhat niini, wala gayud giusab. Dili Siya mahimong mausab, tungod kay Siya man ang walay-pagkausab nga Dios. Kita n'yo? Matikdi nga mibalik Siya mismo sa niining duha ka mga tinunan, nga si Cleopas ug ang higala niini, sa dalan paingon sa Emmaus, ug miingon, gipahinungod ang mga Kasulatan ngadto kanila, miingon, "Nganong pagkabuang-buang ba ninyo sa dili pag-too nga ang tanang Pulong nga gisulat sa mga propeta mahitungod sa Mesias kinahanglan gyud nga matuman?" Oh, daw sa unsa nga adlaw!

<sup>117</sup> Gibuhat pud ni Juan ang mao gihapong butang. "Susiha ang mga Kasulatan, baliki ninyo, ingon nga gikasulti na nga adunay 'tingog sa usa nga magasinggit sa kamingawan.' Diin ba diay ako gikan?" Kita n'yo? Kadto, pagkatin-aw na unta kaayo kadto para kanila. Husto!

<sup>118</sup> Ingong niana pud kini ka-klaro sa karon, kining butang nga atong makita nga ginabuhar sa Balaang Espiritu. Giingon na Niya kaniadto, "Susiha ninyo ang mga Kasulatan." Ug atong... Gusto Niyang buhaton pud nato kana sa karon.

<sup>119</sup> Himatikdi, misugod Siya sa propesiya ni Moises, miingon ang Biblia, "Siya, sugod kang Moises ug sa tanang mga propeta," apan misugod Siya kang Moises. "Usa ka Propeta," ang ingon ni Moises, "ang Ginoo nga inyong Dios magpatindog sa taliwala kaninyo nga mga tawo, sa taliwala sa mga tawo. Ang Ginoong Dios magpatindog og usa ka Propeta."

<sup>120</sup> Karon tingali'g miingon Siya, “Cleopas, ug ang higala mo dinhi, dili ba nag-ingon man si Moises nga sa niining mga adlaw ang Ginoong Dios magpatindog og usa ka Propeta? Ug kining Tawo nga ilang gilansang sa krus, dili ba anaa man Kaniya ang maong kuwalipikasyon? Karon, gipropesiya na kini ni Moises. Ug karon wala pa kamo nagkaaduna og propeta sulod sa gatusan ug gatusan na ka mga katuigan, ug ania mitungha kini nga Tawo. Ug unsa ba ang mag-uuna niini nga Tawo, nga inyong giingon?” Nasabtan n’yo ba kini? Ug ang tanang gisulti sa mga propeta mahitungod Kaniya, alang sa Iyang kapanahonan, gisulti Niya kanila. Siguradong makapaikag gayud nga maminaw Kaniya. Dili ba ninyo gusto nga paminawon Siya? Gusto kong paminawon Siya, paminawon Siya, sa kung unsay gisulti Niya nga gisulti sa mga propeta mahitungod Kaniya, apan wala gyud Niya gisulti nga Siya diay kadto. Gipakita lang Niya kanila pinaagi og propesiya. Gisulti lang Niya, “Miingon ang propeta nga ingon niini ang mahitabo.” Kita n’yo?

<sup>121</sup> Mobalik kita sa pipila ka minuto, ug karon atong paminawon ang mga Pulong nga gisulti gikan Kaniya Mismo. Matikdi n’yo dinhi, ang Pulong Mismo nga ginasulti ang Pulong mahitungod Kaniya Mismo. Ginasulti sa Pulong Mismo ang Pulong mahitungod Kaniya Mismo. Wala gisulti kanila nga Siya diay kadto, kondili gitugotan lang ang Pulong nga manulti alang sa Kaugalingon Niini, aron nga maila nila kung si Kinsa Siya. Ang letra nga Pulong, nga ginakutlo ang Pulong sa... Ang Pulong nga nahimong unod, nga ginakutlo ang letra nga Pulong, ingon nga bug-os kini naipaila diha Mismo Kaniya. Tan-awa dinhi, karon atong paminawon Siya nga nagakutlo. Daw sa... Karon, nasayod kita nga nakabalita na silang duha mahitungod sa ulahing mga panghitabo, nga mao ang, mahitungod sa pagpalansang sa krus ug sa sugilanon mahitungod sa pagkabanhaw, mahitungod sa lubnganan, maingon sa bag-o lang nato gibasa. Karon midiretso Siya sa Pulong sa propesiya mahitungod Kaniya Mismo. Karon hunahunaon lang nato nga gisulti Niya ang ingon niini; sa tinuod nagsulti Siya daghan pa kay sa niini, apan matikdi.

<sup>122</sup> Ingon na nato nga Iyang... paminawon Siya nga nagasulti, “Ablihi sa Zacarias 11:12. Ug dili ba igabaligya man ang Mesias, sumala sa propeta, sa katloan ka buok nga salapi? Miingon kamo nga gibaligya kini nga Tawo sa katloan ka buok nga salapi. Ablihi sa...” Ginalista ba ninyo kini nga mga Kasulatan? Zacarias 11:12. Ug dayon miingon Siya, “Namatikdan ba ninyo kung unsay gisulti ni David diha sa Mga Salmo, Salmo 41:9? Pagabudhian Siya sa Iyang mga higala. Ug dayon usab, sa Zacarias 13:7, gibiyaan Siya sa Iyang mga tinun-an. Ug sa Mga Salmo 35:11, giakusahan sa bakakon nga mga saksi. Ngani nag-ingon man mo nga giakusahan Siya. Isaias 53:7,

amang Siya sa atubangan sa Iyang mga tigbutang-butang. Isaias 50:6, gihampak nila Siya, miingon ang propeta. Mga Salmo 22, magasinggit Siya didto sa krus, ‘Dios Ko, Dios Ko, nganong gibiyaan Mo Ako?’ Gibuhat ba Niya kana, gibuhat niadtong hapon lang sa miaging adlaw? Mga Salmo 22 usab, 18, gibahinbahin ang Iyang mga bisti sa taliwala nila. Gibuhat ba nila kana? Ug Mga Salmo 22:7 hangtud sa 8, gibugalbugalan sa Iyang mga kaaway, ang iglesia. Mga Salmo 22 usab, wala ni usa ka bukog sa Iyang lawas ang madugmok, apan ‘gipalagbasan nila ang Akong mga kamot ug Akong mga tiil,’ ang ingon Niya. Gipangbaklid ang Iyang mga kamot sa luyo Niya, sa walay pagduhaduha, niadtong tungora. “Giingon sa Isaias 53:12 nga mamatay Siya sa tunga sa mga kriminal. Giingon pud sa Isaias 53:9 nga gilubong Siya uban sa mga datu. Giingon sa Mga Salmo 16:10, ‘Dili Ko pagabiyaan ang Iyang kalag didto sa sheol, ni motugot Ako nga ang Akong Balaan makakita og pagkadunot.’ Ug dili ba ang Malaquias 3 man ang mag-uuna sa niini nga Tawo?” Oh, gusto ko gayu’ng madungog Siya nga ginakutlo kana. Tan-awa ang maong mga propesiya! Himatikdi, dayon ang tanang mga tipo nga mahimo Niyang gipanghisgotan, mahitungod kang Isaac, diha sa Genesis 22, kung unsa nga gitipo sa Dios si Isaac, kung unsa nga gidala ni Amahang Abraham ang kaugalingon niyang anak, gipapas-an kini og kahoy pasaka sa bungtod, ug gihalad ang mismo niyang anak.

<sup>123</sup> Misugod kini niadtong tungora nga mituhop ngadto kanila. Human na Niyang giingnan sila nga sila’y mga buangbuang tungod sa ilang wala pagtan-aw sa propesiya alang niadtong adlaw. Ug karon sugod na kining mituhop, sugod na nilang nakita ang katumanan sa tanan tungod niining nangahitabo sa miaging pipila ka mga adlaw, sa miaging duha o tulo ka mga tuig, ang gipanghimatud-an nga propesiya alang sa maong kapanahonan. Mao na kadto dayon nga hingsayran nila nga ang gilansang nga Higala nila, nga si Jesus, nagtuman sa matag Pulong mahitungod niini. Oh, mao na kadto dayon nga naila nila nga kadtong Tawhana mao gayud diay ang Mesias, mao nga—mao nga kinahanglan Niyang mabanhaw gikan sa mga patay. “Dili makahupot Kaniya ang lubnganan. ‘Dili Ko motugot nga ang Akong Balaan makakita og pagkadunot.’ Wala gyu’y ni usa ka Pulong sa propesiya ang mahimong mapakyas. Ug nabanhaw Siya.”

<sup>124</sup> “Kung ingon-ana husto diay kadtong mga mensahero nga atua didto sa lubnganan kaganinang buntag. Nabanhaw Siya gikan sa mga patay. Buhi Siya. Siya mao kadto ang Mesias.” Ngano man? Ayaw ninyo kini pakyasa. “Ang Iyang lihok, ang Iyang ministerio ug ang tanan-tanan nga gibuhat Niya eksaktong gipanghimatud-an ang mga Pulong nga gisulti sa propeta nga magakahitabo alang niining adlaw. Kana mao’y nagbuhat niini.” Busa naila nila nga Siya diay kadto, ang

gilansang nga Higala nila, nga si Jesus, Siya mao ang nagbuhat niini. Dili ikatingala nga ang ilang mga kasingkasing nagdilaab sa sulod nila samtang nagpakigsulti Siya ngadto kanila. Karon nakalakaw na sila og unom ka milya, ug daw sa mora ra kadto og hamubo nga panahon.

<sup>125</sup> Ug ania ang usa pa ka butang nga gibuhat nila, kabalo na mo, nakapatalinghug sila og unom-ka-oras nga wali mahitungod sa gipanghimatud-an nga propesiya. Mao kana ang Iyang gisulti ngadto kanila sa dalan. Dihadiha sa paglakaw na nila didto sa dalan, mitungha Siya, kay atua man Siya didto mismo sa Jerusalem. Unom ka oras huma- . . . human niadto, saysenta ka kilometro, nakapanaw na sila og unom ka milya didto sa dalan padulong sa Emmaus. Mao kana ang nahitabo. Ug miwali Siya, gipamatud-an ang propesiya sulod sa unom ka oras. Ayaw ko ninyo sawaya sa akong tulo ka oras nga pagwali, kung ingon-ana, kita n'yo. Kita n'yo? Apan matikdi, nagwali sila . . . Siya . . . Nakapatalinghug sila og unom-ka-oras nga wali mahitungod sa propesiya nga gipamatud-an, og gipanghimatud-an.

<sup>126</sup> Ingon nga hapit na mogabii kaniadto. Kabalo na mo, Siya mao sa gihapon kagahapon, karon, ug hangtud sa kahangturan. Mao na kadto dayon nga giablihan Niya ang ilang mga mata aron maila nila ang Mga Hebreohanon 13:8, Siya mao sa gihapon kagahapon, karon, ug hangtud sa kahangturan. Sa panahon sa kagabhion, ginahimong klaro ang mga panghitabo pinaagi og propesiya. Ang nagakahitabo sa moderno nga panahon mahimong dali ra nga maila kung toohan mo lang ang propesiya alang sa maong panahon.

<sup>127</sup> “Oo, mga buangbuang, mga hinayan sa pagsabot, hinayan sa pag-too (padayon n'yong ginahinuktokan ang mahitungod niini), hinayan sa pag-too sa tanang gisulti sa mga propeta mahitungod sa Mesias, dili ba kinahanglan man nga mahitabo kini?” Karon gisusi Niya kini nga mga punto pag-usab ug gipakita kung unsay gisulti sa propeta nga magakahitabo. Dayon nagakasabtan na nila. Busa miingon Siya . . . nag-akto nga daw sa mopadayon Siya nga molakaw. Nagustohan nila kini nga Tawo. Ingon nila, “Ikaw, gipaambit Mo kami og usa ka butang. Wala gyud namo kana nahunahunaan. Buhi diay Siya sa kung asa man.” Nagapakigsulti na diay sila Kaniya, og wala mahibalo niini. Busa Siya . . . ug sa walay pagduhaduha gitan-aw Niya sila nga masulob-on, ug hinayhinay na Siya nga milakaw, apan Iyang—Iyang ginahulat sila nga dapiton Siya. Ingon niana pud ang ginahulat Niya karong gabhiona, nga inyong pagadapiton Siya.

<sup>128</sup> Himatikdi, sa diha nga gidapit na Siya niadtong mga tinunan sa ilang pagpakig-ambit palibot sa lamesa, mao na kadto dayon nga gibuhat Niya ang usa ka butang nga sama sa Iyang gibuhat kaniadto sa wala pa ang Iyang pagkalansang, ug nangabuka ang ilang mga mata. Hingsayran nila ang Iyang

linihokan, ang Iyang pamaagi. Hingsayran nila kung unsay Iyang gibuhat, ug gibuhat pud Niya kini sama ra sa Iyang gibuhat kaniadto. Ug miingon sila, “Siya kana!” Ug sa gilayon nanindog sila aron ipahayag kini, ug nawala Siya. Ug kon diin sila naggahin og unom ka oras sa pagpaminaw niadto nga wali, tingali’g sulod sa baynte minutos dali-dali sila nga nakabalik aron pagsulti sa tanang uban pa kanila, “Siya’y tinuod nga nabanhaw gayud. Siya’y tinuod gyud nga buhi.”

<sup>129</sup> Mga higala, mao kini ang katumanan sa Malaquias 4, San Lucas 17, San Juan 15, oh, pagkadaghan, Pinadayag 10, pagkadaghan sa mga propesiya nga eksaktong nakapahinungod niining panahona. Ug usab diha sa Basahon ni Marcos ug sa Mateo, kon diin gisulti Niya kining dagkung mga ilhanan ug mga katingalanan nga motungha diha sa kawanangan, ug ginatawag kini sa mga tawo og mga saucer, mga flying saucer, nga mahimong—mahimong mahanaw ra kono gamit ang gahum ug ingon kapaspas sa hunahuna, og intelihensiya nga makahimo og unsa man. Makasulat Siya, makasulti Siya, makahimo Siya sa bisan unsa ma’y Iyang gusto. Ang gamhanang Haligi nga Kalayo, “ang mao sa gihapon kagahapon, karon, ug hangtud sa kahanaturan.” Ug nagaabot ang mga talan-awon sa kalibutan, mga piramide nga aso nga nagapaitaas ngadto sa kawanangan, ngadto sa itaas kon diin wala na’y kaumog ni bisan unsa, traynta ka milya ang kahabogon. Gipanagna na usa ka tuig ug tunga sa wala pa kini mahitabo, nga mamaingon gyud niana. Dayon liso-a ang maong retrato ug tan-awa kung si Kinsa kanang nagalantaw sa ubos. Wala pa gyu’y ni usa ka Pulong nga gisulti ang napakyas, ug ania ang sinulat nga Pulong sa Dios, nagapamatuod nga Kamatuoran kini. Ug panahon na sa kagabhion usab. Unsa kaha kung mobalik Siya, tungod sa grasya, karong gabhiona ug buhaton ang usa ka butang karon nga sama sa gibuhat Niya kaniadto. Mag-ampo kita ug hangyoon nato Siya. Ang mga panghitabo nga gihimong klaro sa propesiyang gipanghimatud-an.

<sup>130</sup> Dios nga Makagagahum-sa-tanan, tabangi kami. Tabangi kami, minahal nga Dios, nga masabtan, nga masabtan ang mga butang nga kinahanglan namong masayran, nga masabtan ang Imong Pulong. Ug karon, Ginoo, napatalinghugan namo ang mga wali karon nga halos duha ka libo ka tuig, nang gipangsulat diha sa mga basahon. Ug sa niining kaulahiang mga adlaw ania kini nga nagabalik pag-usab, ug karon hapit na ang kagabhion. Ang mga Methodist, mga Baptist, mga Presbyterian, ug daghan kanila sa tanang mga nangaging kapanahonan ang nagpakig-istorya na Kanimo, ug tingali diha sa dalan niining dakung adlaw nga dili pa gabii o adlaw, sama sa giingon sa propeta, apan sa panahon sa kagabhion motungha ang Kahayag. Mibangon si Jesus gikan sa lubnganan ug mipakita kang Simon ug ngadto sa mga kababayen-an, ug gipakita kanila nga buhi Siya. Buntag



kadto. Ug dayon sa pagka-gabii mibalik Siya. Apan nakiglakaw na Siya kanila sa tibuok adlaw, ginasaway sila tungod sa ilang pagkabuta, apan pagkahuman niadto gipaila Niya ang Iyang Kaugalingon ngadto kanila sa panahon na sa kagabhion.

<sup>131</sup> Dios, umari Ka nganhi sa among pagpakig-ambit nga aduna kami karong gabhiona palibot sa Pulong. Dios, halos wala gayud kini toohi sa mga tawo karong panahona, apan mapasalamaton ako nga adunay pipila nga Imong gitawag ug Imo silang gikatagana ngadto sa Kinabuhing Walay Katapusan, ug Ikaw miingon, “Ang tanan nga gikahatag Kanako sa Amahan magaari.” Ug karon samtang nagadan-ag ang panggabii nga mga Kahayag, samtang sikatugotan Mo, Ginoo, nga wala ni usa ka propesiya (sa mga gatusan nga mitungha) ang napakyas ni usa ka higayon sukad. Nan kung tinuod kana nga pagpaila, siguradong Ikaw gyud kana, tungod nga wala ma’y tawo ang mahimong ingon niana ka tukma. Sama ra sa Biblia, nga walay tawo ang makasulat, wala ni usa sulod sa dise-sais ka gatus ka mga tuig, sa kuwarenta ka nagkalainlaing mga manunulat, ang makasulat, nga wala man lang ni usa ka sayup diha Niini.

Minahal nga Dios, nagaampo ako nga igapadayag Mo ang Imong Kaugalingon karong gabhiona, ingon sa gisulat diha sa Mga Hebreohanon 13:8, nga Ikaw mao sa gihapon kagahapon, karon, ug hangtud sa kahangturan. Ug ang mga buhat nga gipamuhat Mo kaniadto, Imong ginabuhat pud karong panahona. Ug gisaad Mo kini, miingon Ka, “Sa niining kaulahiing mga adlaw, sa diha nga ang kalibutan mahisama na sa Sodoma ug Gomora, grabeng kahiwian.” Makita namo kining batan-ong mga kalalaken-an nga sama na gayud sa mga kababayan-an, nanagsul-ob og mga bisti nga iya sa mga babaye, ug—ug makita pud namo ang batan-ong mga kababayan-an nga nagapaninguha nga manglihok nga sama sa mga kalalaken-an, ug makita namo ang mga kababayan-an ug mga kalalaken-an sa niining tinuis na nga kapanahonan, makita namo nga ang sex appeal nahimo nang usa—usa ka diosdios nga ginasimba. Gipagawas na ang Ebanghelyo, ug anaa na sa pagkahubo ang iglesia sa Laodicea. Oh Dios, pagkagrabe nga panahon! Umari Ka, Ginoong Jesus, ipadayag ang Imong Kaugalingon nganhi kanamo. Kay amo kining ginapangamuyo sa Ngalan ni Jesus.

<sup>132</sup> Karon samtang inyong giduko ang inyong mga ulo, nakapiyong ang inyong mga mata, mangutana ako kaninyo og usa ka butang. Nagatoo ba kamo nga ania ang Dios? Nagatoo ba kamo nga ang mga butang nga ginabuhat Niini sa karon mao’y propesiya nga natuman? Nagatoo ba kamo nga si Jesus Cristo mao sa gihapon kagahapon, karon, ug hangtud sa kahangturan? Nagatoo ba kamo nga sa kaniadtong ania pa Siya dinhi ug nadayag diha sa unod alang niadtong panahona, ug ang mga buhat nga gibuhat Niya kaniadto, kinahanglan nga mahitabo pag-usab niining panahona? Ingon niana ang gisulti sa propeta.

Ingon niana pud ang gisulti sa Biblia. Ang tibuok Kasulatan mamatuman gayud, dili gyud kini mapakyas. Giunsa man Niya pagpaila ang Iyang Kaugalingon? Pinaagi sa pagkahimong Propeta nga gihisgotan ni Moises kaniadto. Nahibaloan ang mga tinago sa mga kasingkasing sa mga tawo. Pagkahikap sa babaye sa Iyang bisti, milingi Siya ug miingon, “Ang imong pagtoo nagluwas kanimo.” Sa diha nga miduol si Simon Pedro ngadto Kaniya, hingsayran Niya ang ngalan niini, gisultihan siya kung kinsa siya, og kung kinsa ang iyang amahan. Ug kadtong mao ra nga hiligugmaong Jesus dili patay, Siya’y buhi sa walay katapusan. Dalaygon ang Dios! Ug nagatoo ko, nga niining panahon sa kagabhion karon, gitawag Niya kita pag-usab.

<sup>133</sup> Oh Ginoong Jesus, umari Ka sa among taliwala. Ayaw kami labyi. Umari Ka, pabilin uban kanamo sa tibuok gabii hangtud nga matapos kining gabhiona, dayon tugoti kami nga mouban Kanimo ugma; aron maila Ikaw namo diha sa gahum sa Imong pagkabanhaw, aron ang Imong gugma ug grasya ug kalooy mamaanaa kanamo. Oh Eternal nga Dios, itugot kini nga mga butang. Nasayod kami nga ang Dios lamang ang makahatag sa mga niini.

<sup>134</sup> Sa pagkamahinuklogon niining orasa, igasulti namo kini. Dios, nga among Amahan, ang among lawas mao’y usa ka mahuyang nga tabernakulo alang Kanimo. Apan, Ginoo, itugot nga ang Imong nagabalaan nga grasya, ang Imong Balaang Espiritu, moanhi karon. Hinlo-i kami sa tanang pagduhaduha ug sa tanang kalibog, sa tanang katahap ug sa tanang matang sa dili-pagtoo nga ania kanamo, aron nga mamahimo kaming gawasnon nga walay ni usa ka pagduhaduha; manggawas kami, nga maisogon nga magapahayag sama ni Pedro, “Ikaw mao ang Cristo, ang mao sa gihapon kagahapon, karon, ug hangtud sa kahangturan.”

<sup>135</sup> Nagatoo kami nga ang Imong Pulong Kamatuoran, Ginoo. Itugot nga makita namo, sa dili pa namo pagasugdan kining linya sa pagpaampo, Ginoo, ipadayag kanamo ang Imong Kaugalingon. Sama sa giingon Mo, “Maingon sa nahitabo kaniadto sa mga adlaw ni Lot,” sa diha nga si Abraham, kadtong pundok nga tinawag-pagawas nga nagahulat alang sa usa ka gisaad nga anak, atua pud si Lot didto nga nagapatalinghug sa usa ka modernong Billy Graham ug usa ka Oral Roberts sa niadtong denominasyonhong kapunongan didto, ingon nga usa ka nasud. Apan si Abraham usa ka lumalangyaw nga walay unsa man nga organisasyon, usa ra kini ka gamay’ng pundok nga naglatagaw didto sa yuta nga iyang pagapanundon. “Ug ang maaghop magapanunod sa yuta.” Usa niadto ka adlaw, ilalum sa landong sa kahoy, samtang nagapanglingkod sila, nagapahulay, mikanaug ang Dios diha sa porma sa usa ka Tawo. Miadto pud ang duha ka mga manulonda ngadto sa Sodoma. Ug ang Dios, diha sa usa ka tawhanong lawas, nagpamatuod nga Siya mao,

ingon Siya, “Abraham, asa ba ang imong asawa, nga si Sarah?” Pila ka mga adlaw sa wala pa kadto, siya’y si Abram; ug S-a-r-r-a, Sarra; dili Sarah, “prinsesa.” Ug gitawag Mo siya sa iyang prinsesa nga ngalan, anak nga babaye sa usa ka hari. Gitawag Mo si Abraham sa iyang ngalan, nga Abraham, usa ka amahan sa mga nasud. Ug miingon Ka, “Pagaduawon Ko ikaw.”

<sup>136</sup> Dios, daw sa unsa nga ang kasingkasing niadtong propeta siguradong miugpot gayud! Nasayod siya kung Kinsa Ka niadtong tungora. Dili ikatingala nga gihugasan niya ang Imong mga tiil, gipagawas ang tanang pagkaon nga aduna siya, ug ang pinakalami, gitanyag kini sa Imong atubangan. Nasayod siya nga ang Dios gyud kadto. Dayon ingon Niya, “Asa ba si Sarah?” ingon nga mora’g wala Siya kahibalo. Ug Imong . . .

<sup>137</sup> Giingnan Siya ni Abraham, “Anaa siya sulod sa balongbalong . . . anaa siya sulod sa balongbalong sa likod Mo.”

<sup>138</sup> Ug gisulti Mo kung unsay mahitabo. Ug si Sarah, sulod sa iyang kasingkasing, nagduhaduha Niini. Ug pagkahuman Imong—Imong giingnan si Abraham, “Nganong nagduhaduha man si Sarah niana, nga miingon diha sa iyang kasingkasing, ‘Kining mga butanga dili na gyud mamahimo’? Aduna ba’y butang nga malisud sa Dios?”

<sup>139</sup> Oh Dios! Si Jesus, ang nadayag nga Pulong sa Dios, miingon Ka, “Maingon sa nahitabo kaniadto sa mga adlaw sa Sodoma,” ang kalibutan maanaa pud sa ingon niana nga kahimtang sa dili pa ang paglaglag sa kalibutan sa Gentil, sa dispensasyon sa mga Gentil. Ania kami, nga mga Sodomahon na gayud! Ug dayon giingon Mo usab nga ang Anak sa tawo, nga kanunay’ng gipahinungdan ingon nga usa ka “propeta,” igapadayag na nianang taknaa. Tumana ang Imong mga Pulong, Oh Dios. Kami, nga Imong matinoohong mga anak, nagapaabot nga may matinud-anon nga mga kasingkasing, nga mahatagan kami og pagtoo, Ginoo, nga, sa dihang ipahigayon na namo ang linya sa pagpaampo, managpanoo gayud ang mga tawo. Panahon na sa kagabhion, Amahan. Itugot nga ang panggabii nga mga Kahayag sa Anak sa Dios (Siya nga mao ang sa Kaniadto, ug sa Karon, ug ang Umalabot) igapadayag karon ang Iyang Kaugalingon pinaagi sa propesiya nga Iya kaniadtong gihimo. Sa Ngalan ni Jesus Cristo. Amen.

<sup>140</sup> Andam na ako karon nga—nga iampo ang mga masakiton. Apan usa kini ka talagsaon nga butang, daw sa unsa nga pag nagatindog na kita dinhi. Ania ako nagatindog dinhi karon nga nagahimo og usa ka paghagit nganha sa kadaghanan, ug sa mga nakakonekta sa tibuok nasud, nga Dios sa gihapon ang Dios. Dili Siya mapakyas. Ug kung unsa ma’y Iyang ginasaad, kana’y Iyang pagabuhaton. Dili gyud Siya mapakyas nga buhaton kini, kay gisaad na Niya nga buhaton kini. Mao nga mahimo kong ipahimutang ang matinuuron kong pagsalig

sa kung unsay Iyang giingon. Busa nagapaabot ako sa Iyang Pag-abot, nagaapabot ako Kaniya nga motungha sa unsa mang oras, tungod kay miingon man Siya, “Sa usa ka takna nga wala ninyo pagadahuma,” wala pagadahuma sa kalibutan, “nianang tungora motungha Siya.”

<sup>141</sup> Karon, kutob sa akong nahibaloan . . . Ania ako sa akong tabernakulo dinhi, ug adunay pila ka mga tawo nga nagalingkod dinhi nga akong—akong kaila. Si Igsoong Wright, ang pipila sa niining mga nagalingkod dinhi, nga mga ania mismo dinhi, nga akong kaila. Apan daghan pud kaninyo ang wala nako hiilhi. Ug wala ako’y paagi sa pagsulti nga buhaton kini sa Dios karong gabhiona. Nakita na nato Siya nga ginabuhat kini sa nangaging mga katuigan ug mga katuigan, apan mahimo pud nga dili Niya buhaton kini karong gabhiona. Wala ako kahibalo. Anaa ra kana Kaniya. Makagagahum Siya. Ginabuhat Niya kung unsa ma’y gusto Niya. Walay makasulti Kaniya kung unsay pagabuhaton. Nagapabilin lang Siya, sa Iyang kabubut-on ug sa Iyang mga pamaagi. Apan tungod kay gisaad na Niya kini, hangyoon ko Siya nga buhaton kini. Dili kini tungod para kanato, nga gikinahanglan nato kini, kondili tingali’g para kini sa pipila ka mga estranyo, nga mangdihog ang Balaang Espiritu . . . nga mangdihog karon nganhi kanato. Karon, bisan unsaon pa Niya sa pagdihog kanako, kinahanglan Niya kamong dihogan, usab, sigurado, aron motoo.

<sup>142</sup> Karon gusto kong magpahigayon og linya sa pagpaampo, ug gusto kong iampo ang mga masakiton kutob sa akong mahimo. Karon, puede kitang maghimo og usa ka linya, aron pagatawgon ang mga tawo ug paanhion sila dinhi, sa usa ka linya sa pagpaampo ug iampo ang tanan dinhi nga mga masakiton, siguro, paduolon ko ang mga igsoon kong ministro dinhi uban kanamo, ug nga magpandong og mga kamot diha kaninyo. Siguradong mahimo nato kana. O kaha mahimo natong hangyoon ang atong Amahan, Kinsa mao lamang ang Usa nga makahimo sa bisan unsang butang para kaninyo, tungod kay ang akong mga kamot iya sa tawo nga sama ra pud kaninyo nga mga tawo. Apan ang pinaka-importante niini, dili kini ang kamot sa tawo ang nagabuhat niini; ang Pulong kini sa Dios. Ang pagtoo sa niana nga Pulong mao ang nagabuhat niini. Walay siyentipikong butang mahitungod niini, bug-os gyud kini nga dili-siyentipiko.

<sup>143</sup> Wala ni usa ka butang nga aduna ang Cristohanon diha sa iyang hinagiban nga siyentipiko. Nahibalo ba kamo niana? Gugma, kalipay, pakigdait, pagkamapuanguron, pagkamaayo, pagkamalulot, kaaghop, pailub, pagtoo, Espiritu Santo, ang tanan niini dili makita sa siyensiya. Ug ang mga ingon niana lang nga butang ang matuod ug malungtaron. Ang tanan nga inyong makita nagagikan sa yuta ug magabalik pud sa yuta. Pero ang mga butang nga dili n’yo makita sa inyong mata, apan makita

Kini nga ginapahayag ang Kaugalingon Niini, kana mao'y iya sa kalibutan nga Eternal.

<sup>144</sup> Motoo kaha kamo, kung ipadayag sa Dios ang Iyang Kaugalingon ug ipakita nga ania Siya dinhi nga buhi, nga ginapamuhat ang mao rang mga butang nga gibuhat Niya kaniadto sa sinugdan, pagkahuman niini nga Mensahe, dawaton n'yo ba kini ingon nga inyong kaayohan? Hinaut nga itugot kini sa Dios. Karon ginahangyo ko ang si bisan kinsa dinhi sa bilding, bisan kinsa ka man o kung taga-asa ka man, ginahangyo ko ikaw nga toohan lang kini nga Mensahe nga mao gayud ang Kamatuoran. Mao kini ang Mensahe nga aduna ang Dios diha sa Iyang Biblia alang niining taknaa, nga ania si Jesus Cristo karong gabhiona ug buhi gayud. Karon halos . . .

<sup>145</sup> Kamong tanan nga mga tawo nakaila na kanako, taga dinhi ra ko mismo sa siyudad kon diin ako nagdaku. Wala gani ako og edukasyon sa unsa man nga tulonghaan sa gramatika. Tinuod gyud kana. Ug nakaila na mo kanako sa igong gidugayon, nanghinaut ko nga nagkinabuhi unta ako sa inyong atubangan nga naipakita kaninyo nga matinud-anon ako ug sinsero. Dili ako usa ka hipokrito. Bisan ang akong mga kritiko dili nagasulti kanako og ingon-niana. Sila, ginaingon lang nila, "Ikaw—dili man ka hipokrito, kondili sayup ka lang gayud. Wala ka lang nahibalo nga sayup ka diay, og dili mo tinuyo." Dili man siguro ako og ignoranteng sayup, tungod kay ang Pulong sa Dios nagapamatuod mismo sa akong Mensahe, ug Kini gayud ang magasulti kaninyo kung Kinsa Kini. Ug klaro nga nadungog ako ninyo nga nagaingon nga dili Kini ako, busa kung ingon-ana Siya gayud Kini. Husto ba kana? Magmaaduna mo og pagtoo sa Dios kung ingon-ana. Tan-aw dinhing dapita, ug toohi ninyo ang Dios. Kung mahimo n'yong toohan ang Dios, igatugot kini sa Dios nganha kaninyo. Kung mahimo Niya kanang buhaton sama sa gibuhat Niya kaniadto, kung ingon-ana Siya sa gihapon mao ang Dios. Nagatoo ba kamo niana?

<sup>146</sup> Nagatoo ka ba niini? Aniyay usa ka gining nga nagalingkod dinhi sa akong atubangan, nagatan-aw kanako, nga may mga luha sa iyang mga mata, matinuuron gayud. Wala ako makaila kung kinsa siya, wala ko pa gyud siya nakita. Usa ako ka estranghero kanimo. Sa hunahuna mo nakahibalo kaha ang Dios sa tinago sa imong kasingkasing, sa imong mga tinguha, o sa imong sala, o unsa pa man? Sa hunahuna mo nakahibalo kaha Siya? Sa hunahuna mo mahimo kaha Niyang ipadayag kanako kung unsay imong sala, kung unsay imong nabuhay, kung unsa ang dili mo unta angay'ng gibuhay, o ang imong tinguha, og unsa pa man? Kung buhaton Niya kini, makapahimo kaha kini nga imo Siyang toohan, masayran mo nga Siya gayud kini? Dawaton mo ba kini ingon nga Siya gayud? Dili ang imong sala ang nagapabalaka kanimo; gisugid mo na kana. Kondili nagapangandoy ka sa bautismo sa Iyang Balaang Espiritu.

Madawat mo Kini. Nakita ko Kini nga nagakunsad na diha kaniya.

147 Aron nga inyong mahibaloan nga nagatan-aw ako sa maong babaye, nagatan-aw pud siya kanako, gusto kong ipakita kaninyo ang Balaang Espiritu. Tan-awa n'yo dinhi, sa ibabaw mismo niining gamay'ng babaye nga nagalingkod dinhi, ubos lang sa akong tiilan dinhi. Sa pagsulti ko niana, mao pud mismo kana nga butang ang ginapangandoy niya, ang bautismo sa Espiritu Santo. Nagatoo ka ba nga madawat mo Kini, igsoon? Ipataas ang imong kamot, kung ingon-ana. Wala ko pa gayud nakita sukad ang maong babaye sa tibuok kong kinabuhi, sa nasayran ko.

148 Makita ko kining lalaki nga nagalingkod dinhi samtang ginaduko ang iyang ulo, nga nagalingkod dinha mismo, nga dunay kwelyo nga wala mibagay kaniya, ug uban pa. Nagaantus ka tungod sa sakit sa pantog. Nagatoo ka ba nga ayohon ka sa Dios? Ipataas ang imong kamot kung imo bang dawaton Kini. Sige, igahatag kanimo sa Dios ang imong hangyo.

149 Kining batan-ong lalaki nga nagalingkod dinhi mismo, nagapangandoy alang sa bautismo sa Espiritu Santo. Nagatoo ka ba nga ihatag Kini sa Dios kanimo; sir, ikaw nga adunay puting korbata nga nakasablay sa imong likod? Igahatag kini sa Dios.

150 Nagaampo kining lalaki dinhi alang sa iyang asawa. Anaa siya sa institusyon sa mga buang. Nagatoo ka ba nga ayohon siya sa Dios, himoon siya nga mamaayo na? Nagatoo ka ba niini? Maangkon mo kini.

151 Ikaw nga ginahawiran ang imong tutunlan, nagatoo ka ba nga mahimong ayohon sa Dios kanang sakit sa kasingkasing nga nagapahasol kanimo, kanang sakit pud sa tiyan nga aduna ka? Nagalingkod ka dinha, nga nagaantus karon mismo. Husto ba kana? Nagatoo ka ba nga nagaayo Siya kanimo? Kung ingon-ana maangkon mo kini. Amen.

152 Nakita n'yo Siya mao sa gihapon kagahapon, karon, ug hangtud sa kahangturan. Pangutan-a kanang mga tawhana, hibaloa kung nakaila ba ako kanila. Wala gyud ako makaila, apan nakaila Siya. Amen. Tan-awa n'yo kanang Kahayag dinha sa kilid sa bungbong, nga nagapaibabaw mismo sa usa ka lalaki nga nagalingkod dinha. Nagaantus siya sa usa ka kahimtang sa dugokan diha sa iyang likod. Dili siya taga-dinhi, siya'y taga-Georgia. Mr. Duncan, toohi sa tibuok mong kasingkasing, nga ayohon sa Dios kanang problema mo sa likod. Nagatoo ka ba sa tibuok mong kasingkasing? Panalanginan ka sa Dios.

153 Aniyay usa ka lalaki nga nagalingkod dinha sa luyo, nga may problema sa likod, nga nagatan-aw kanako. Wala ako makaila kaniya, apan si Mr. Thompson kini. Nagatoo ka ba? Tindog ka, sir, dinha sa luyo, aron nga . . . usa ako ka estranghero kanimo. Husto kana. Apan nagalingkod ka dinha, nga nagaampo. Naayo

na ang imong problema sa likod karon. Giayo ka na ni Jesus Cristo.

154 “Sa panahon mismo sa kagabhion motungha ang Kahayag.” Dili ba ninyo makita, nga ania Siya karong gabhiona! Siya mao ang gamhanang MAO AKO. Siya mao sa gihapon kagahapon, karon, ug hangtud sa kahangturan. Nagatoo ba kamo niini? Nalipay ug kumbinsido ba kamo nga si Jesus Cristo kini nga ginapaila ang Iyang Kaugalingon, ginapaila ang Iyang Kaugalingon diha sa propesiya?

155 Ayaw’g kabalaka mahitungod sa mata. Nagaayo ang Dios sa mga masakiton ug sa mga nanag-antus.

156 Pila ba ka mga tawo ang . . . Pila ba ang ania dinhi, nga mga masakiton? Tan-awon nato ang inyong mga kamot. Mora gyud og grabeng mga panginahanglan ug mga kabug-aton. Kamo bang mga tawo adunay mga prayer kard? Wala ako kahibalo kung unsaon ko kamo pagpaduol dinhi. Gusto ko unta nga maiampo kamo, pero wala ko kahibalo kung unsaon pagbuhat niini. Nakita ninyo kung unsa, tan-awa ninyo ang bungbong, unsaon man nako sa pagduol kanila dinha? Unsa na lang kung magkaguot ang usa ka agianan? Aduna na man gud og usa dinha nga naaribahan na mismo, mao nga nahunong ang tanan.

157 Paminaw, paminawa ko ninyo. Aduna na ba ko’y gisulti kaninyo sukad og bisan unsang butang diha sa Ngalan sa Ginoo kondili ang kung unsa lang ang nagakatuman? Husto ba kana? Ang tanan-tanan kanunay gyud nga husto. Wala gyud ko sukad nangayo kaninyo bisan usa ka sentimos nga kuwarta sa tibuok kong kinabuhi, dili ba? Wala ni usa ka higayon. Wala pa gayud ko sukad nagkuha og usa ka offering sa tibuok kong kinabuhi. Wala ako mianhi alang sa kuwarta. Wala ako mianhi aron limbongan kamo. Ania ako aron mapadayag ang Pulong sa Dios alang niining panahona. Gisulti ko lang kaninyo ang Kamatuoran, ug gipamatud-an kini sa Dios nga kini ang Kamatuoran. Karon sultihan ko kamo, MAO KINI ANG GINAINGON SA MGA KASULATAN, nga kung ipandong sa magtotoo ang iyang mga kamot nganha sa masakiton, miingon si Jesus, “Mangaayo sila!” Nagatoo ba kamo niana? Kung ingon-ana, diha sa Presensiya sa Dios, dili ba ninyo toohan nga pagabuhaton Niya kini karon mismo?

158 Karon ipandong ang inyong mga kamot diha sa usa’g usa, ug ipabilin lang kana dinha sa makadiyut. Karon, ayaw—ayaw usa’ mo pag-ampo, ipandong lang ang inyong mga kamot diha sa usa’g usa; kamo pud dinha sa tibuok nasud. Ug ako, mismo, ginapandongan ko usab kining mga panyo. Karon gusto kong motan-aw kamo kanako sa makadiyut lang. Unsa ba’y wala gibuhath sa Dios? Tan-awa kung unsa Siya, ang Pulong nga atong gibasa, ang mga propesiya nga atong gihisgotan, kung giunsa pagpaila ni Jesus ang Iyang Kaugalingon pinaagi sa mga

propesiya. Karon tan-awa ninyo ang maong panahon, ug kining miaging tulo ka semana diin atong giila ang panahon nga atong gikapuy-an. Tan-awa n'yo kung unsay atong gibasa, mahitungod sa mini nga mga propeta ug mga ilhanan nga halos mopahisalaag sa mga pinili. Kung unsa nga nahipadayag na ang Pulong, kung unsa nga gibutahan sa dios sa niining kapanahonan ang bakak . . . ang mga kasingkasing sa mga tawo. Ug kung unsa nga gisulti sa Dios Mismo pinaagi sa Iyang mga propesiya nga kining mga butanga magakahitabo gayud sa niining Kapanahonan sa Laodicea. Wala na'y bisan unsa man ang gibiyaan nga wala buhata. Ania ang Dios nga mao sa gihapong Dios nga nagpakigsulti niadtong mga tawo sa Emmaus, nga nagpaila sa Iyang Kaugalingon pinaagi sa mga propesiya nga gisulti nang daan mahitungod Kaniya, ania Siya karong gabhiona nga ginapaila ang Iyang Presensiya pinaagi sa mga propesiya nga gisulti nang daan alang niini nga kapanahonan. Siya mao sa gihapon kagahapon, karon, ug hangtud sa kahangturan. Matoohan ba ninyo kini? Kung ingon-ana ipandong ang inyong mga kamot diha sa usa'g usa. Ayaw pag-ampo alang sa inyong kaugalingon, apan sa kaugalingon n'yong paagi pag-ampo alang nianang tawo nga gipandongan ninyo sa inyong mga kamot, tungod kay nagaampo man sila alang kaninyo. Karon tan-awa, ayaw pagduhaduha.

<sup>159</sup> Ug karon kung makita unta ninyo kung unsa ang akong ginalantaw! Ug kabalo na mo nga wala ako nagapamakak kaninyo, ingon nga nagatindog dinhi. Kung makita unta ninyo, ug mahimo sa inyong pagtoo nga mapaduol kanang gamhanang Balaang Espiritu nga nagalutawlutaw diha sa kahanginan—kahanginan, nga nakudakan na sa siyensiya, ug makita Kini nga nagapanglihok sa tibuok niining bilding nga nagapaninguha nga makakaplag og usa ka dapit nga—nga pagakunsaran, nagapaninguha nga makakaplag og usa ka dapit nga maangklahan. Toohi lamang Kini, igsoon kong lalaki. Gipaila na Niya kini pinaagi sa Kasulatan ug uban pa, nga husto kini. Karon pag-ampo kamo nga dunay pagkasinero alang nianang tawo nga gipandongan ninyo sa inyong mga kamot; nagaampo pud sila alang kaninyo.

<sup>160</sup> Minahal nga Jesus nga Nazaretnon, ngani, nasayod kami, Ginoo, pinaagi sa Pulong, nga ania Ka dinhi, tungod sa maong saad nga maania Ka dinhi, “Diin gani ang duha o tulo nga magakatigum sa Akong Ngalan, anaa Ako sa ilang taliwala. Ug kini nga mga ilhanan maganunot kanila nga nagatoo; kung pandongan nila sa ilang mga kamot ang mga masakiton, mangaayo sila.” Dinha sa mga nakakonekta niining telepono, hinaut nga ang gamhanang Balaang Espiritu mokunsad ngadto sa matag kongregasyon. Hinaut nga ang mao rang Balaan nga Kahayag nga among nakita dinhi mismo sa iglesia, hinaut nga mokunsad Kini nganha sa matag usa, ug hinaut nga mamaayo



sila niining orasa. Ginahinginlan namo ang kaaway, ang yawa, diha sa Presensiya ni Cristo; ginasultihan namo ang kaaway nga napildi na siya tungod sa—sa giakong pag-antus, tungod sa kamatayon ni Ginoong Jesus ug sa Iyang madaugon nga pagkabanhaw sa ikatulo nga adlaw; ug sa Iyang gipamatud-an nga ebidensiya nga ania Siya dinhi sa among taliwala karong gabhiona, nga buhi gayud, human sa dise-nuebe ka gatus ka tuig. Itugot nga ang Espiritu sa buhi nga Dios magapuno sa matag kasingkasing nga may pagtoo ug kagahum, ug gahum sa pagpang-ayo pinaagi sa pagkabanhaw ni Jesus Cristo, Nga ginapaila karon sa niining dakung Kahayag nga nagatuyok-tuyok sa iglesia, sa Iyang Presensiya. Sa Ngalan ni Jesus Cristo, itugot kini alang sa kahimayaan sa Dios.

<sup>161</sup> Hinaut nga kining mga panyo nga among ginaampo, hinaut nga mopaingon gyud ang mga niini ngadto sa mga masakiton ug sa mga nanag-antus nga gitagan-an na niini. Hinaut nga ang mao gihapong Balaang Espiritu nga ania karon nga ginapaila ang Iyang Kaugalingon, ipaila unta ang Iyang Kaugalingon ngadto sa matag masakiton nga mapatungan niini. Hinaut nga pagapun-on og ayo sa Presensiya sa Dios ang ilang kasingkasing og pagtoo hangtud nga ang balatian sa ilang lawas mamaayo na. Ginapangamuyo namo kini, alang sa kahimayaan sa Dios, diha sa Presensiya ni Jesus Cristo ug sa Ngalan ni Jesus Cristo, ingon nga mga alagad ni Jesus Cristo among ginapangamuyo kini. Amen.

<sup>162</sup> Karon diha sa inyong mga kasingkasing, dili ko igsapayan kung unsa ma'y inyong sakit, mahimo n'yo ba, diha sa inyong kasingkasing, nga toohan sa tibuok n'yong kasingkasing nga ang Pulong sa Dios naghatag kaninyo sa inyong hangyo? [Nagalingon ang kongregasyon, "Amen."—Ed.] Nagatoo ko nga ang matag kamot, ingon nga akong makita, gipataas gayud. Kung ginatoohan ninyo kini, karon hinumdumi, nga tapos na kini.

<sup>163</sup> Kamo nga anaa dinha sa mga linya sa telepono, kung nagatoo kamo sa tibuok ninyong kasingkasing, samtang nagapandong og mga kamot ang mga ministro nganha kaninyo, ug ang inyong mga minahal sa kinabuhi usab nagapandong og mga kamot nganha kaninyo, kung nagatoo kamo sa tibuok n'yong kasingkasing nga tapos na kini, tapos na kini. Ang gamhanang Balaang Espiritu, ania Siya dinhi sa tabernakulo karong gabhiona. Nakita ko Siya nga nagapanglihok ibabaw sa mga tawo, gipakita ang Iyang Kaugalingon dinhi dapit sa kilid sa bungbong, ug mikunsad nganha sa usa ka lalaki, mikunsad dinhi ug sa tibuok bilding, nga ginapahayag ang mga tinago sa mga kasingkasing, ang pagpaila sa Iyang Presensiya, aron ipakita nga Siya mao sa gihapon kagahapon, karon, ug hangtud sa kahangturan. Ania Siya sa atong taliwala! Dios Siya, ang walay-pagkapakyas nga Dios.

<sup>164</sup> Ug dili ba ang atong mga kasingkasing nagdilaab man sa sulod nato, ug dili ba nagdilaab pud kini karon, ang mahibaloan nga ania kita karon sa Presensiya sa nabanhaw nga si Jesus Cristo, nga Kaniya ang himaya ug pagdayeg sa walay katapusan; Nga mao gayud ang nadayag nga dagway ni Jehovah nga Makagagahum-sa-tanan; Nga mikunsad sa porma sa usa ka Haligi nga Kalayo didto niadtong nagadilaab nga sapinit, aron danihon ang pagtagad sa usa ka propeta; Nga mikanaug ngadto sa bukid, ug kinsa man gani ang mahitamak niadto siguradong mamatay gayud, gawas lang ni Moises ug ni Josue. Daw sa unsa nga gipangunahan Niya ang mga anak sa Israel kaniadto latas sa kamingawan, didto sa ilang panaw, ingon nga tipo sa tinawag-pagawas nga mga tawo sa karon. Ania Siya, bisan sa siyentipikong pagtuki, gipaila pud ang Iyang Kaugalingon sa atubangan sa siyensiya. Ug pinaagi sa Iya mismong mga pagpamuhat ug pinaagi sa Iya mismong propesiya, mga butang nga gipropesiya mahitungod sa Iyang mga pagabuhaton niining panahona, nga maoy nagapahimo Kaniya nga mao sa gihapon kagahapon, karon, ug hangtud sa kahangturan, hingpit gayud nga gipamatud-an. Dili pa ba kini igo nga mahimong magdilaab ang atong mga kasingkasing sa sulod nato? Panalanginan kamo sa Dios.

<sup>165</sup> Karon ingon nga nagkahiusa, manindog kita ug magaingon: Ako nang ginadawat karon si Jesus Cristo ingon nga Manluluwas ug Mananambal. [Nagaingon ang kongregasyon, “Ako nang ginadawat karon si Jesus Cristo ingon nga Manluluwas ug Mananambal.”—Ed.] Ug pinaagi sa Iyang grasya, [“Ug pinaagi sa Iyang grasya,”] sukad karong taknaa, [“sukad karong taknaa,”] Oh Dios, [“Oh Dios,”] itugot nga wala na’y dili-pagtoo [“itugot nga wala na’y dili-pagtoo”] ang mosulod sa akong kasingkasing, [“ang mosulod sa akong kasingkasing,”] tungod ako nang nakita [“tungod ako nang nakita”] ang propesiya [“ang propesiya”] sa niining panahon [“sa niining panahon”] nga natuman. [“nga natuman.”] Nagatoo ko [“Nagatoo ko”] nga si Jesus Cristo [“nga si Jesus Cristo”] buhi gayud [“buhigayud”] ug ania Siya karon [“ug ania Siya karon”] nga ginapamatud-an ang Iyang Pulong [“nga ginapamatud-an ang Iyang Pulong”] sa niining panahon. [“sa niining panahon.”] Ang mga propesiya [“Ang mga propesiya”] nga nahisulat na mahitungod Kaniya [“nga nahisulat na mahitungod Kaniya”] natuman na karon sa among taliwala. [“natuman na karon sa among taliwala.”] Siya ang akong Manluluwas, [“Siya ang akong Manluluwas,”] ang akong Dios, [“ang akong Dios,”] ang akong Hari, [“ang akong Hari,”] ang akong Tanan-tanan. [“ang akong Tanan-tanan.”]

<sup>166</sup> Minahal nga Dios, dungga ang among testimonyo. Ug ihatag kanamo, sa matag adlaw, ang Tinapay sa Kinabuhi. Ug nagahalad kami og pagdayeg Kanimong, Oh Dios, gikan sa kinahiladman sa among kasingkasing. Ginadayeg Ikaw namo,

ang Bugtong Gamhanan, ang Dios sa mga propeta. Sa Ngalan ni Jesus Cristo. Amen.

Oh, pagkamaanindot nga takna, pagkamaanindot nga panahon!

. . . only believe;  
Only believe, just only believe,  
All things are possible, only believe.

Mahimo natong awiton kini nga sama niini.

Now I believe, oh, now I believe,  
All things are possible, now I believe;  
Now I believe, oh, now I believe,  
All things are possible, now I believe.

Mao na ba kana ang inyong testimonyo? [Nagaingon ang kongregasyon, "Amen."—Ed.] Karon samtang ginaduko nato ang atong mga ulo.

Till we meet! till we meet!  
Till we meet at Jesus' feet;  
Till we meet! till we meet!  
God be with you till we meet again!

[Si Igsoong Branham nagsugod na sa paglaylay og *God Be With You*, dayon nagpakig-istorya kang Igsoong Neville—Ed.] Aduna ka ba'y gustong isulti? Vayle.

. . . at Jesus feet;  
Till we meet! till we meet!  
God be with you till we meet again!

<sup>167</sup> Samtang nagaduko ang atong mga ulo, ania nagatindog si Igsoong Vayle aron magpapauli kanato diha sa pag-ampo. Si igsoong Lee Vayle, usa siya ka manunulat para sa tabernakulo dinhi, bahin sa literatura ug mga libro, ug uban pa. Usa gayud ka bililhon nga igsoon, nakauban ko siya sa daghan na nga mga buluhaton. Aduna lang unta ko'y higayon nga ang matag ministro, mapasaka sila dinhi ug makapakig-istorya kanila. Siguradong, nakasabot ra mo. Sa matag ministro, malipayon kami nga makauban kamo dinhi. Sa tanan nga mga nagasimba, sa mga tawo sa nagkalainlaing mga kaiglesiahan, unsa pa man, malipayon gyud kami nga makauban kamo dinhi. Ug sa tinuod gayud amo kining pag-ampo para sa usa'g usa, "Ang Dios magauban kaninyo hangtud nga magkita-kita pag-usab." Samtang nagaduko ang atong mga ulo, ug nakataas ang atong mga kamot, ato kining kantahon pag-usab nga may pagkamalulot ngadto sa Dios.

Till we meet! till we meet!  
Till we meet at Jesus' feet!  
Till we meet! till we meet!  
God be with you till we meet again!



*MGA PANGHITABO NGA GIHIMONG*  
*KLARO PINAAGI OG PROPESIYA* CEB65-0801E  
(Events Made Clear By Prophecy)

Kining Mensahe ni Igsoong William Marrion Branham, una giwali sa Ingles niadtong Dominggo sa gabii, Agosto 1, 1965, sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2018 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)